

政蹟

撰邑乘而輯當事諸辰告為政蹟例似不倫雖然前  
事之不忘後事之師也溯此邦大定之初一時碩輔  
名卿扶傷救敝民受其賜於今為烈若之何其可誼  
耶抑昔人云不習為吏視已成事懷綬戾止者慎憲  
省成率由不忒斯編固宣德達情之先路歟志政蹟

長沙縣志

卷之十七

政蹟

薦舉疏

經畧

洪承疇

為欽奉

恩詔謹舉所知即祈

皇上勅部覆議事竊

臣

經畧五省駐劄湖南將及四載先

奉

恩詔欵開山林隱逸果有懷才抱德通達治體者該督撫  
覈實舉薦朕親加試用欽此近又奉

恩詔欵開一除革職降級休致回籍外地方人才果有才  
行著聞及學問優長者著該督撫核實具奏欽此臣並  
有地方之責向來未敢輕舉正為人才最難知人尤



難恐舉非其人有負

恩詔特典今察有原任江南太平府推官胡爾愷長沙縣人由丁丑科進士臣察其履歷崇禎末年任太平府推官將及三年歷有多薦順治元年自江南回籍養親投誠已久住居長沙府之近鄉湖南荒殘十餘年無力出仕屢經寇亂隱逸山林其志節可知臣自十一年三月內抵任長沙面會一次見其氣格端凝舉止詳慎知爲不凡之品此後自十二年十三年並未到臣軍前詢之道府廳縣皆謂爾愷鄉居多不進城卽進城亦不謁會地方官從來不見一尺牘干求未

長沙縣志

卷之十七

政蹟

二

見一僕從投呈其行誼可知臣於今十四年正二月差官迎接二次詢以吏治民情悉皆周知且年力正壯素勤學問湖南兵火之後縉紳絕少如此恬修醇行足爲湖南風勵如

恩詔內懷才抱德通達治體固未易得其人而才行著聞學問優長實足稱地方人才督撫按臣駐劄隔遠未經覲面無由覈實舉薦臣旣見聞親切何敢不據實具奏以備

廟堂採澤倘蒙

皇上不以臣舉爲謬



勅下該部再加覆議應否令

臣將胡爾愷起送赴京聽候

皇上試用果堪拔擢或仍復原官或別有酌奪一惟出自

上裁

臣謹會同湖廣總督

臣祖

湖廣撫

臣

張

偏沅撫

臣袁合詞上

聞伏乞

皇上睿鑒施行奉

旨吏部議奏順治十五年三月十一日奉

上親試諭吏部薦舉胡爾愷著以科員用本月二十一日

奉

旨胡爾愷補吏部給事中

長沙縣志

卷之十七

政蹟

三

請蠲賑疏

巡撫

金廷獻

竊惟正賦雖關國用民命實為邦本慨湖南之民自

明季癸未賊張獻忠殘害荼毒殺擄之餘斷手則足

慘酷異常繼而羣賊縱橫連年盤踞百姓逃亡田地

荒蕪迨至順治四年我

朝開闢一二子遺方出湯火及三王班師而五年之內

大逆一隻虎等糾合賊眾數十股分頭攻犯湖南各

府州縣盡為賊有僅保辰長兩孤地百姓之存者又

死田地之熟者又荒矣六年內親王南征再復凱旋

北上賊復乘閒猖狂土地人民又遭塗炭及定藩續



至提師入粵續順公統兵又來地方雖漸次恢復而  
皮骨僅存之民併征以五六年之荒糧坐撥於王  
公兩營之兵餉取逼一朝追呼並迫而且解寶解粵  
船運則苦於灘高水險陸運則疲於背負肩挑脚費  
倍於正供民苦甚於牛馬臣目擊心愴亟欲爲民請  
命緣以前督羅繡錦派撥已定故屢咨移請意期痛  
念時艱少蘇民困豈知固執不移臣亦無可如何矣  
然民戴

清恩雖甘心輸將勉強轉運猶望時泰年豐不料九年  
自春徂秋半載不雨泉枯土赤禾苗盡槁况湖南山

長沙縣志

卷之十七

政蹟

四

多田少卽雨暘時若稻子而外別無他種非比平原  
之地尙有豆麥菽粟可望今田禾無顆粒之收千里  
皆不毛之地民苦饑荒之未已又遭黔逆之鴟張湖  
南盡已陷沒擄掠搜括四野無遺重斂苛徵膏髓盡  
竭嗟乎盡天下之民極百姓之苦未有甚於湖南者  
也我

皇上御極以來頒

恩蠲賑不一而足惟是湖南開闢獨後邀

恩不早卽有除荒徵熟之例而五年所報之荒乃四年以  
前之荒至於報荒之後淪陷不一則五年所報之熟



者又復成荒而五六年之荒者竟未一報致令有司按圖而索以一人而當通戶之差以荒田而作熟田之徵連年逋欠追比難完是以存者又復逃亡逃者難期再返如長沙府知府張宏猷力辦軍需拮据勞苦猶被指叅者皆因疊年逋負一時並徵民空財盡有以致之湖南雖皆至苦而長沙尤爲特甚且今大兵南征求牧與芻尙爾艱難卽深山窮谷間有殘黎牛盡種絕春耕已廢鵠面鳩形救死不贍尙忍於嚴刑峻法之下問數年之舊欠今歲之新徵乎我

皇上命親王遣大兵無非奠安土地救全赤子若不重加

長沙縣志

卷之十七

政蹟

五

軫恤徒傷元氣愈失人心有土無民將安用之凡此皆經道府州縣詳報甚確臣尤目擊最真且寇勢猖獗地方未開人爭向背不能不仰懇

皇上下沛洪恩昭宣遐邇將湖南六府二州六七八九年之舊欠盡行蠲免十年分之新徵查荒徵熟保此目前未死之殘黎留爲將來輸納之根本萬一施恩後時仍照別省災荒之例查明分數再爲覆請竊恐以日爲歲之民不能待我

皇上如天之覆也統乞

勅部施行奉



聖旨戶部速議具奏奉 部看得楚省湖南衡州永州辰州常德長沙寶慶郴靖二州節經寇亂現在用兵撫臣金廷獻備陳凋殘情形籲請求蠲六七八九年舊逋以安子遺相應如議將該府州六七八九年舊欠果係在民者悉行蠲免以廣

皇仁可也奉

聖旨是

請蠲恤疏

總督

張長庚

竊惟西山諸寇負固於秦蜀楚三省之界久逋天誅在

長沙縣志

卷之十七

政蹟

六

皇上救民水火前特令三省官兵合師剿除 臣准部文郎

兢兢以師行糧從爲急務一切軍需與撫 臣竭廢料

理極力辦解絲毫無誤又以近取之師兩路並進運

米運料刻不可緩而往來之路又皆羊腸鳥徑人跡

不到其一應輸輓之力自不得不取給於民而計算

人夫所需甚繁 臣與撫臣暨司道各官公議照糧起

派近者百里之外遠者千里之外無奈一派不足而

至再派再派不足而至三派四派矣給過銀米前題

在案然經年累月險遠勞苦筋力交疲不得休息困

憊之狀無不九死一生且私幫貼費所用無窮受累



日久疲勞已極臣憫其萬分困頓計惟有鼓勵慰勞令其勉強供役間有私逃累斃者又不得不報提補以濟急需幸各師取給之糧料並無一毫缺乏此楚民之已勞萬萬無復加矣乃師持日久又蒙

皇上發遣禁旅合力攻圍計口授食與芻米之需又極浩繁臣預爲持籌有備無患廣爲儲積以便兩路接濟又只得多雇民力刻期取足以資飛輓斯得大兵無軍需不繼之慮自郝李諸逆漸次掃蕩滿漢各師又攻抵茅廬山圍困李逆官兵糧運何等重大高山峻嶺重巒疊嶂巨石巉巖險遠艱難之狀不可形容

長沙縣志

卷之十七

政蹟

七

寢食靡遑料理不遺餘力仍令各夫一自河溶長運又一路自香溪安塘迭運計五年前後所派已用夫二十餘萬矣而運夫西山自春夏至秋冬餐星宿露背負跋涉皆穿春破膚加以炎天酷暑熱氣炎蒸死亡疾病不可數計每每屍積滿路臭腐之氣人不堪聞此皆將軍各大人等所目擊者又將軍曾咨移到臣極言夫死之慘兼各督運官詳報在案臣往來巡視各隘親見其慘但處於軍需緊急之時封疆事重無可奈何徒爲痛心疾首有病故者又令設法雇補以濟急需屢據各屬詳文告寬告減亦不遑顧惜仍



只曉以大義示以利害再則許以事竣之後疏請蠲免正賦以慰其心今仰

天威李逆殄滅地方蕩平正小民永享太平出離湯火之日其死故之夫已俱行該地方官確查家屬酌量賑濟並責命掩埋骸骨而回家各夫又躬赴荊州料理大兵凱旋皆緣疾病之餘鳩形鵠面奄奄一息仍恐不得全活是兩載以來小民血枯髓盡元氣實難驟復又思民爲邦本若不重加賑恤何以起死回生臣忝任總督楚省之民皆

皇上之赤子臣安敢坐視其顛連不爲據實上聞也伏乞

長沙縣志 卷之十七 政蹟 八

垂憐楚省重困之餘大沛雨露或將康熙四年應徵錢糧作何蠲免以甦重困此枯槁之民得蒙再造洪恩則國脈培而邦本固全楚子民永沐

皇恩於萬年矣

謹陳利弊疏

吏科給事 胡爾愷

竊惟治世首重恤民必使民耕作食息寬然有餘而後可漸臻於熙皞之化未有窮年愁嘆蹙蹙靡騁囂然喪其樂生之心而可語於文武成康之治者他不具論卽以臣鄉楚省言之歷年苦兵之後又復繼以災傷生聚未聞膏脂已竭此如久病羸弱之人亟宜



投以參苓之劑庶元氣得以漸復若仍尅伐不已未有不奄奄就斃者謹將目前救斃之方條列數款爲皇上陳之

一催徵錢糧之宜有序也舊例徵糧之法二月開徵編餉九月開徵南漕而且立以程限或三限或四限俾民無迫促之擾邇年以來催科無節或冬月而預徵來歲之糧或二月而嚴比一年之米此外雜辦更多甚難枚舉急遽無序奔命不遑實有剜肉補瘡之痛懇

勅撫按各該州縣以後開徵編餉必於本年之春仍立三

長沙縣志

卷之十七

政蹟

九

限爲期令民遵限於本年內全完以免拖欠至於徵米必俟秋成則禾稻登場之時上下皆易爲力其各州縣除修理城池重務外或自興土木等項務自出錢雇覓不許擅役民夫以妨耕作此體恤民力之大端也

一裝兵船隻之宜造也楚省大兵絡繹往來更替無歲不然拏船之害已非一日每遇大兵經臨於一月之前各處差役封號而各役因以爲利不分大小一概封拏或私賣放或攫取客貨以至商賈聞風而遠遁長江寂無片帆不惟弊竇叢生抑且羈遲軍旅近



聞江西造船四百餘隻人皆稱便楚省何獨不然其造船之費聞江西係各官捐助今卽不能盡捐亦須行文各府查有何項可以動支其不足者酌府縣大小均派捐輸亦衆擎易舉公私兩便之道也

一私造船隻官貨發民之宜禁也兵船糧船不得不造之故民皆知之近年地方各官每每私造大船貿易營利有一官而造二三隻者經年不絕材木之近水者砍伐殆盡勢必採之深山一木動民夫百餘人計十數日而後得至水次不分寒暑苦累難堪每成萬斛之舟必斂千家之怨及至販賣鹽貨等物派發

牙僧轉派細民加耗收買流弊無窮且有屬官爲上司追呼與錢糧同比較者其病民莫大焉伏乞嚴行飭禁嗣後除兵船糧船外不許私造一隻并私發一貨違者指名題叅不惟民力賴以少蘇而貪官爲商賈之行者庶亦知所做矣

一長夫兜轎之宜痛革也驛遞夫馬原有額設之數乃有夫馬之外每里派夫若干名於各衙門常行答應詢長夫則里遞出夫應役詢工食則私派民間如善化一邑每糧一石除正項外派銀四錢五分亦作長夫工食小民稱苦已非一日動費百金驛遞自有



額驛錢糧况有鄰縣協濟銀兩乃猶以堯轎累民則其中侵吞之弊總不可知伏乞

勅撫按嚴飭各地方將長夫堯轎痛行禁革仍勒碑通衢永遠遵守則夙弊已革而窮黎稍可息肩矣

以上四款皆地方積弊若不急爲興革民累長此安窮統乞

皇上軫恤凋殘除一弊則興一利所造非淺小也奉旨該部議奏

直陳湖南利弊疏

胡爾愷

臣辦事垣中見吏部覆臣同官梁鉉

長沙縣志

卷之十七

政蹟

十一

勅諭之綸旨屢頒一疏內稱各省地方刑名錢穀驛站等項利弊繁多非一時可盡應

勅服官在邸諸臣果有確見應聽晰陳奉有依議之旨仰見

皇上居高聽卑不遺遐邇邇凡爲臣子敢隱諱而不畢陳耶

臣楚之湖南人也竊見邇來四方未必盡皆無事而

苦者惟楚爲甚湖南更甚自明季兵賊蹂躪殘毀瓦礫荆榛千里如一青燐白骨所在皆然頃者大兵屯

駐有年在事諸臣方拯溺扶傷之不暇而軍興孔亟休息爲艱一切精粗巨細之物無一不採辦於民間



官無論尊卑不分暑雨祁寒率皆胼手胝足則小民竭蹶艱難之狀不問可知然事關軍務官不敢言勞民不敢稱苦其勢然也至於爲有司者上之怵於功令有不敢不奉行之法下之窘於窮黎有勢不能自白之隱請就近事之切於民瘼者摘陳其概如丈量田地所以清荒熟核隱匿均甘苦也湖南歷年兵火大率田在草間蓋因人民鮮少牛隻湧貴糞田不足人力不齊故往日之肥饒者今瘠薄矣往日之廣濶者今狹小矣自丈量之法行則新墾未報者自應照熟科糧但有畝數與弓口不符每丈一畝止得七八

分者比比而是夫田之有餘者糧旣議加則不足者糧亦應議減且行文之時弓手算手公正里遞造冊紙張等項使費供應民累已多而丈失之田無除豁之令而有賠累之苦則清丈徒以厲民也合無令藩司將各州縣所報魚鱗冊細查丈過田畝數依所定上中下則例照田攤糧務令糧之輕重多寡與田之升合尺寸符合不爽則荒熟可清隱匿可核而甘苦可均也如查人丁所以稽戶口防隱占杜包賠也湖南遠不具論自戊子己丑辛卯壬辰異變奇荒相繼接踵止有耗散而鮮生聚邇年奉有查丁之例有司



惟務丁多以邀紀薦於舊額之外不難驟加數千究之照糧科派遂有糧少而丁多賠累何可勝言合無令藩司仍將各州縣所報人丁冊籍發回各該府廳逐一細查果有丁者方准入冊卽照糧編派亦必多寡均平無得參差不一以致里胥高下其手徒滋弊端則戶口可稽隱占可防而包賠可杜也至於里遞困憊總因賦重差繁每當輪役之年取辦不可勝算夫差則有長夫短夫背夫擡夫青草夫等項雜辦則有猪羊牛鷄鶩鴨以及細瑣難名之物無一不取給焉又衙役革舊換新亦令里遞僉補有每年雇募糧書一名費至二三十金者里遞窮多富少各項安能出辦勢必派花戶協幫故正供有限而雜費無窮此小民之所以重困也請

勅撫按嚴行飭禁以後有應公用者有應申詳者於正項

開銷雜項則各官自行設處不得擅取里遞衙役則

出名募勿令里遞僉補仍榜示通衢以杜里胥詐騙

花戶之弊庶可蘇困於萬一矣驛遞凋疲

臣

前疏已

陳其概湖南馬少而貴駑駘下乘亦價值三五十金

驛遞舊額已屬不敷而差繁甚於往日且其地方遼

遠每站有百餘里差使遇到站之處每每騎馬過站



以一馬往還奔馳動至數百里故易至倒斃又責里  
遞賠補且差繁馬少則以竹轎代之人力之於馬力  
相去何啻倍蓰而恤馬酒煙等費亦索之於人夫嗟  
嗟窮民何能堪此應行各州縣多買健馬驢騾於舊  
額之外不妨量爲加增官自雇夫喂養不得委之於  
民而一切往來差使嚴禁需索恤馬等情至竹轎人  
夫永遠禁革違者官叅吏拏於以清驛遞而除民累  
未必不由於此也學校原以儲育人才湖南大亂之  
後士子日不聊生何暇治舉子業以故人才寥落從  
未有甚於今日者且雖奉有釐剔優免之例然猶有  
長沙縣志

卷之十七

政蹟

十四

許免本身丁徭之文湖南士子未沾此惠久矣或因  
本身數石之糧與齊民一體應差比較催徵固所不  
免有拘押者有羈禁者甚有徑行鞭笞者夫出入衙  
門包攬錢糧原有明禁若有應差比較之役又焉能  
禁其出入清其包攬乎請

諭提學道臣申飭有司除生員果有逋欠包攬情弊應遵  
新定部議究處外其有本身丁徭自應照舊豁免至  
於別項不法事宜亦必申詳學道黜革衣頂之後方  
許羈禁鞭笞如有不遵許學道詳院題叅亦稍增士  
氣於凋殘之後耳以上均丈量核人丁寬里遞蘇驛



站培學校皆湖南利弊所關伏乞嚴飭撫按諸臣痛  
爲釐革所造於遐荒非淺鮮也臣繕疏已畢因思湖  
南遼濶之鄉其去省城有遠至千餘里者目今偏沅  
撫臣遠在行間料理軍務其地方一切民隱所得以  
上聞者惟巡方御史是賴今按臣周季琬丁憂回籍  
計已半年有餘迄今尙未差遣則此數千里吏治民  
情誰爲激揚誰爲軫恤如此疲敝之鄉誠有切於他  
省者仰乞

皇上亟擇部院大臣前往受事則殘疆之仰賴宏多矣

請恤災傷疏

胡爾愷

長沙縣志

卷之十七

政蹟

五

竊惟天災流行盛世不免水旱氛祲之異正上天以  
譴告爲仁愛而修省之道務期實惠及於窮簷乃可  
以迓休和而消沴戾伏閱邸報自夏秋以來四方災  
變不一如秦晉豫省之冰雹楚粵江南之水患人畜  
致多死傷禾苗盡歸泔爛賦稅何出民命何依此災  
變之大者各撫按疏報踵至部覆行查俱已奉有

俞旨第從來

朝廷下令每如流水之源而有司奉行反致屯膏之嘆  
者蓋有故焉撫按旣經奏報部覆必俟查明文移往  
來動經數月而自撫按司道以下及於州縣又不知



歷幾何時州縣必問分數於里排某鄉某村孰災孰甚差役一番紛擾已不可言層累而上由府而道而司而院經年累月展轉稽延際此徵輸孔亟之時有司不能停徵以待追呼敲扑勢所不免百姓之不能逃不卽死者或鬻妻子以供賦稅及至邀恩蠲免而箠楚之下皮骨無存非歸墨吏之囊卽飽奸胥之腹是

朝廷雖有浩蕩之恩而小民未蒙涓滴之惠誠可爲痛心疾首者也蓋賑恤災傷急則有裨而緩則無濟今晉省去京不遠行查已數月矣而杳然未報又臣鄉

長沙縣志

卷之十七

政蹟

六

荆襄武漢黃安等府巨浸滔天小民幾成魚鼈紛紛逃竄今歲之秋成失望來年之東作難期不於此時作速賑恤將見不爲流亡卽爲盜賊爲患正匪細故伏乞

皇上垂念湯火子遺復遭異變惟有奄奄待斃之苦立下蠲免之詔且令撫按有司多方賑濟以挽天變以活窮黎更乞

勅部轉飭各該撫按嗣後凡遇災傷地方該管州縣立刻身親踏驗卽將被災戶數併印信甘結粘連具報以憑撫按星夜詳明入告該部三日內卽與具覆或蠲



或賑取自

上裁以免再行駁查費時日而滋繁擾則閭閻疾苦可朝上而夕下而

九重德意不至爲紙上虛文矣奉

旨該部知道

請湖南早補官職疏

工部尙書 趙開心

竊照湖廣一省爲闖獻二賊荼毒二十餘年自荷

王師掃蕩軍民始出水火而慶生全然所恃以撫循者則莫如設官又莫急於府州縣官前塘報歸順之日

臣屢具疏請撫按請守令誠有見於地方之官關係

長沙縣志

卷之十七

政蹟

七

不小補一好官則萬民受其福早補一日則早受一日之福今撫按監司湖南湖北俱已無遺缺矣惟有郡守邑令并未補官昨吏部員外歐陽蒸有家人自湖廣來問彼中光景則曰地方傾心向化可得稍安只委官多不得人甚以本鄉人貽害本鄉百姓急急望都中選官來且急急望

朝廷頒恩詔來此其言最的確而其情甚迫切蓋守令與士民最相親近上以傳佈德意下以體恤民隱真不啻父母之於赤子故雖得數監司不若先得一賢守令也伏乞



皇上軫念殘疆不遺楚服遐遠

勅下吏部將湖廣府縣官凡未補者盡行選授即將前此  
所頒

恩詔各令抄一通前往俾窮鄉下邑咸知

朝廷德意且促其朝受命而夕就道以早慰地方瞻望  
之恩則無廢事無缺官其

恩施遐方者非小也如不以臣言為套仰祈

聖斷速賜施行

請停丈量疏

巡撫 周名南

為遵諭陳言事康熙四年三月二十八日接吏部咨

長沙縣志

卷之十七

政蹟

六

令在外巡撫條奏民隱

臣

即參酌時宜無如停止丈

量一案遂繕疏同刑名錢穀數事上陳忽於四月初

二日接邸報見臺臣鄭 暫停丈量一疏又見臺臣

張 亟停丈量一疏皆切切言丈量之不便於地方

而急急求罷臣何敢再為瀆陳近接邸報俱未蒙大

部准行夫大部不蒙允行者恐有奸猾之民承不稅

之田急圖清釐耳臣思一縣之中果有奸猾之民不

過屈指數人一望而知其實老幼無倚窮苦無告者

成千累萬戶戶皆是也恐今日之丈量未必盡清其

奸猾而已先累其窮苦何以見先累其窮苦如一縣



之中造冊紙張數千百萬丈地弓手數十百人寫算書手數十百人催督衙役稽查官吏層層逼迫夫此人工飯食紙張算寫皆里下窮民攤派倩雇而成事也如臣痛其攤派而叅拏官吏又無縣官自賠飯食紙張工價之例既急急以勒成其事而又察察以苛刻其細有是理乎此窮民之必受其累者也何以見其狡猾者未必盡清其弊夫狡猾者謀畧多端一聞丈量百計彌縫能倩算手能倩書手能倩弓手此間能必縣官心眼俱到鐵面無私毫無滲漏者乎如其不然是狡猾者未必能清而窮苦者實受其累也爲

長沙縣志

卷之十七

政蹟

十九

今之計欲清豪猾之弊而甦窮民之累莫如停丈量一案丈量一停一切繁費俱止鑽營俱息如臣所言一縣之中可以屈指算出豪猾者嚴令自首免罪卽將首出之田作文出之田按畝起科仍取盡首無隱本人與里鄰甘結並縣官稽查甘結報部如再朦混許鄰里舉首臣等訪拏叅處亦足懲一儆百矣再按一府之中幾縣一縣之中現在荒糧若干熟糧若干歷年開墾若干實在荒田若干旣按前項稍力之家漸督開墾不過數年之後盡成膏腴亦猶是清查也而此中固有輕便撫綏者在總之上下公私無一時



一事不取給於田畝必留一分餘地而民始樂於趨  
事必凡事省儉而民始漸有起色臣宵夜思維小民  
之隱情與地方之便益實出於此謹冒昧仰籲以聞  
議覆地丁漕項疏

巡撫 趙申喬

爲

聖治已極隆平等事該臣看得浙江道御史王瑋條奏江

浙徵收漕項錢糧併稅契南糧給兵等款先准部覆

咨移到臣隨檄行布政司會同驛糧道遵照查議

去後茲據該司道會詳內稱御史王瑋條奏漕項混  
徵一欸部覆嗣後於串票內註明地丁漕項數目分

長沙縣志

卷之十七

政蹟

二十

別徵收如有朦混徵比指名題叅因行據各該府州  
詳覆漕項錢糧爲數無幾向與地丁合數按畝科徵  
分欸起解若必另串徵收則小民分釐銀數分等稱  
納反爲滋累議於開徵之時出示曉諭凡完納錢糧  
串票內註明地丁漕項數目庶徵比不致混淆又南  
漕給兵一欸覆查湖南南秋二糧無論營汛同城州  
縣與不同城州縣隨到隨給並無貽誤防守兵民兩  
便已非一日又稅契銀兩一欸湖南俱係司發契尾  
號簿令各州縣儘徵儘解原無定額並無按圖私派  
之處等因會詳呈覆前來臣查湖南各屬有漕州縣



與無漕州縣漕項錢糧按地丁銀兩計之爲數均屬無幾若另徵給串則小民零星分納不無滋累莫若於串票內註明完納地丁漕項數目庶徵比不致混淆而小民亦無分釐零星完納之苦又查各屬南糧歷係各營汛附近關支兵民久已相安仍撥附近州縣兵丁自領不惟無誤於防守而且有益於民間至徵收稅契銀兩歷係藩司給簿聽民投納並無按圖私派之事毋庸查議臣謹會題伏乞施行

部覆

該臣等查得湖南巡撫楊以民生資乎穀食而稔

長沙縣志

卷之十七

政蹟

三

稻則惟賴水以生故周禮遂人治野捐膏腴之地以爲溝洫誠以蓄洩有時則旱澇不得爲田患所棄者小所利者大也後世阡陌旣開溝洫踵廢然陂澤池塘實與田畝相依倚近水則腴遠水則瘠所在皆然湖南濱臨洞庭各屬多就湖濱築堤墾田與水爭地常有衝決漫溢之憂經前撫臣蔣題請近湖荒地禁民築墾在案此外各屬非近江近湖之田皆藉塘池以爲灌溉塘池水足則夏秋久晴亦浥注有資乃愚民昧於遠計往往廢水利而圖田功不獨大江大湖之濱及數里數頃之湖蕩日漸築墾盡失舊蹟卽



自巳輸糧管業數畝之塘亦培土改田一灣之澗亦截流種稻彼徒狃於雨暘時若之歲以塘爲無用不知偶值旱澇所得不償所失卽如本年湘陰武陵等邑各有偏災此皆去湖稍遠水無接濟皆由於塘多改田之故又流澗之水遠近取資若徒恃巳業截墾爲田則上溢下漫無不受累現在各屬訟案糾紛大半由此此弊不獨湖南大約東南各省無處不然查乾隆九年浙江布政司潘思桀請禁侵佔官湖止指湖蕩官地而言若民業塘池尙未議及臣愚以爲

國家生齒日繁地土日闢至於關係水利之蓄洩當仍

長沙縣志

卷之十七

政蹟

三

以地予水而後水不爲害田亦受益但小民無知不能遠慮而地方官又或因田糧較塘糧加重以改折陞科爲勸墾之功遂貪目前之小利而忘經久之大害臣思從前已經改墾之田逐一清釐因恐滋擾若自今以往嚴行禁止於東南各省甚爲有益應請

皇上勅下各省督撫轉飭地方官將池塘陂澤蓄洩之利明白曉諭凡地關蓄水及出水者俱不許自恃巳業改墾爲田其有現在因墾爭訟者令地方官親自勘明但有碍水利卽不許報墾此後如刁民有不報官私將塘池改墾爲田者查出重懲仍予改正地方官



有聽民混將塘池改墾爲田希圖陞科微利攘爲勸墾政績者查出叅處等因於乾隆十一年正月十九日奉

硃批該部議奏欽此欽遵於本月二十二日抄出到部查乾隆九年八月內大學士議覆浙江布政使潘思渠條奏禁止侵佔官湖報墾爲田案內以湖蕩關係水利自應寬深容納行令該督撫於凡有湖蕩之地委員查勘除已經報墾之地畝外其餘蓄水之處劃明界限不許再行開墾阻塞水道等因通行各省督撫遵照辦理在案今該撫楊 奏稱愚民昧於遠計往

長沙縣志

卷之十七

政蹟

三

往廢水利而圖田功不獨大江大湖之濱日漸築墾卽自己輸糧管業數畝之塘亦培土改田截流種稻偶值旱潦所得不償所失又流澗之水遠近取資若截墾爲田則上溢下漫無不受累此弊不獨湖南東南各省無處不然查乾隆九年浙江布政使潘思渠請禁侵佔官湖止指湖塘官地而言若民業塘池尙未議及臣思從前已經開墾之田逐一清釐因恐滋擾自今以往應請

勅下各省督撫轉飭地方官將池塘陂澤蓄洩之利明白曉諭凡地關蓄水及出水者俱不許改墾其現在爭



訟者令地方官勘明但有碍水利卽不許報墾此後  
刁民有私改爲田者查出重懲地方官有希圖陞科  
爲勸墾政績者查出叅處等語查農政之要水利爲  
先瀦水之區湖塘是賴必使蓄洩有備庶得旱澇無  
妨倘任其截墾爲田阻塞水道則旱無灌溉之資潦  
有漫溢之憂是以先經大學士於議覆浙江布政使  
潘思榘條奏案內通行各省督撫凡有湖蕩蓄水之  
處設法禁制不許再行開墾蓋所以廣水利而裨田  
功也今該撫楊 以從前止指湖蕩官地未及民業  
塘池奏請一併飭禁查民業池塘雖小民自有之業

長沙縣志

卷之十七

政蹟

十四

但其中或爲蓄水之溝或爲通水之徑若皆培土截  
流改墾爲田一遇旱潦水無容洩旣無益於已業轉  
爲害於鄰田應將該撫楊 所奏再通行各省督撫  
轉飭地方有司及水利各官善爲勸導出示曉諭除  
從前已經改墾之田毋庸清釐以免滋擾外嗣後無  
論官地民業凡有關於水道之蓄洩者一概不許報  
墾倘有自恃已業私將塘池陂澤改墾爲田有碍他  
處民田者查出重懲如果有可墾之地應改之田於  
水道並無妨碍仍聽民間報官勘明准其開墾改折  
陞科若地方各官任民混請改墾察勘不實者該督



撫卽行查叅議處俟

命下之日臣部通行各省督撫一體遵照可也

請將倉穀多借疏

巡撫 趙申喬

爲小民粒食爲艱泣請早借倉穀事看得湖南各屬積貯倉穀例於每年青黃不接之時將一半借給窮民一半存倉備賑遵行已久茲據布政使施世綸詳據桂陽等州縣詳稱去歲秋穫不登米價騰貴今東作方興窮民乏食懇將倉穀早爲借給並懇於借給之外酌量多借緣由該司以多借之處不便允行請照往例借給一半餘存一半加謹收貯等因具詳請

長沙縣志

卷之十七

政蹟

三

示前來隨經批令通飭各屬一體照例借給以紓艱食如有蠹棍冒領及該州縣虧空藉端開銷者查出定行叅究等因批飭遵照在案臣查湖南之民全賴耕種爲業上年自夏徂秋旱魃爲災業將安仁等六縣先後具疏題報已沐恩蠲賑其餘各州縣雖未成災而秋收甚歉民鮮蓋藏以致今歲穀價高騰在在遏糶不惟貧窮者日食無措卽有銀者亦無穀可買但各縣捐積穀石原蒙

皇上軫恤民依積貯以備荒歉今湖南倉穀照例借給一半外其存倉之穀亦係備賑之項臣請各屬存倉一



半穀石行藩司轉飭該州縣確查實在饑民量爲多借務使乏食小民皆沾恩惠仍嚴飭不許豪強富戶假捏多領候秋收時著令一併照數還倉俾窮民不致失所而農事得免廢弛則湖南數百萬窮民均沐再造之恩於無旣矣

請嚴行禁革疏

巡撫 郭世隆

恭維我

皇上勵精圖治宵旰勤勞無日不以吏治民生爲念而三楚地方風俗猶未淳美民物尙未安阜者皆由官吏因循陋弊不能振刷頽靡也蓋督撫藩臬監司守令

長沙縣志

卷之十七

政蹟

三

雖秩有尊卑皆屬臣子務期洗心滌慮共勉良圖毋養奸而滋惡毋縱蠹而殃民毋黷貨以剝民財毋濫刑以殘民命自是風行草偃大法小廉以仰答

皇上養惠元元之至意

臣

謹會同湖廣撫臣年

偏沅撫

臣金

據藩臬司道條議習弊之實甚者臚列入款

嚴行禁革第

臣

等在任之日尙能禁之於一時

臣

等

離任之後或不禁之於他日故不憚瑣瀆敢請

勅旨勒石永垂鑒誡

一軟撻硬駝之弊宜除也從來徵收錢糧皆當遵照定額若額外多徵卽爲私贓或有指稱貲費等項公



然科派如闔邑通里共攤同出者名曰軟搵如各里各甲輪流獨當者名曰硬駝此皆由地方豪紳劣矜及奸民惡棍專工包攬借此夥結有司倡此異議以爲分肥撮潤之計久而州縣衛所官吏遂爲把持挾制卽或官有稍知自愛者而亦不能更張悛改竟視爲例所當然牢不可破以致豪劣奸棍橐肥囊盈而窮簷良懦日貧月乏是從前積弊貽累甚深故宜勒石永禁

一陋規雜派之多宜除也如遇大差大役固有因公而派者乃遂有假公濟私以一派十者又有每年每

節派大小禮儀者而郡守之交際亦有派之各屬者有府廳州縣衛所一出門夫馬之外派中伙派路費以及跟役之食用者有上差往來派送規禮下程過客交際派送贐儀酒食至起解餉銀又別立名色曰解費曰奏銷每千銀派若干兩若夫現年應役則有磕頭花紅酒席之陋例甚而至於府道亦有開徵之陋例是一邑之中私派橫徵竟有倍於正供者至南漕二項又有監兌下縣之規禮差人坐催之規禮府道書役之規禮且書役之苛勒竟有倍於官長者嗟嗟民力幾何豈堪如此之剝索乎嗣後上下衙門各



須潔已自愛革除陋習不得仍蹈前轍故宜勒石永  
禁

一徵糧之滾單宜行也如一邑每里之中或五戶或  
十戶立一滾單于某戶名下註明田糧若干該銀若  
干春應完若干秋應完若干或分作十限一限該完  
銀若干發給甲內首名挨次滾催令民遵照部法自  
封投櫃不許包戶銀匠櫃役執戥稱收一限若完二  
限又挨次滾去如有一戶沉單不完不繳查明卽嚴  
拏究處是旣省差役之滋擾又省里排之科歛且省  
民一分之濫費卽增民一分之正供旣增民一分之

正供卽省各官一分之考成豈不大有益於官民乎  
故宜勒石永行

一訟棍之包攬詞訟宜禁也楚俗刁悍率以越訴爲  
常毋論戶婚田土小忿口角有不由州縣而遽赴上  
控者有已經結案多年而忽思翻案妄控者有州縣  
府道業已斷明而又誣鱗問官牽告衙役羅織多人  
以爲准狀之套頭者此蓋由各屬不逞之徒往來省  
會結交在省訟棍狼狽爲奸遇事生風代人架捏情  
詞包告包准扛幫硬証而愚民無知信若神明甘心  
健訟往往傾家敗產而不悔若庭鞠得實原告受反



坐之條被告受拖累之苦而訟棍猶安然無事飽食無禍也嗣後此等訟棍務嚴行重究按光棍例定擬以禁刁風故宜勒石永禁

一酷刑濫刑之宜禁也查梃牀一項久經禁革近楚中各監口有一刑具名曰大鐐不論輕重罪囚凡無賄者夜俱置之於此中與梃牀名異而實同雖謂謹防越獄起見然手鐐脚鐐鎖項之三件犯罪重者原許並用而大鐐何爲也凡監口有此者官當立刻清查嚴飭禁卒拆燬又如夾棍一項原爲極刑卽長有二尺以外者總爲三木之下已無求而不得何須再

以尺餘之夾棍爲用不幾極刑中之極刑乎至於木枷竹板輕重大小俱有定式又定例開載如有違制刑杖嚴行焚燬仍著體訪酷員等語則一百二十斤之重枷暨瓦樣之大板尺餘之夾棍皆當遵

旨焚燬嗣後各屬官吏須身體力行不得陽奉陰違致干功令故宜勒石永禁

一誣盜之宜嚴飭也查楚中倚山帶湖固多匪類爲民牧者自當嚴飭捕役緝拏真盜真賊不可草率了案以致無辜含冤乃地方各官一聞失事惟慮盜難弋獲遂任捕役橫行拏獲真盜者固有而誣良栽贓



陷害者亦復不少如有形跡稍涉疑似及捕役素所  
嫌怨者公然鎖拏私行弔拷種種非刑不認不休及  
其屈認方始到官而官惟顧一己之考成不問是盜  
之果否捕役之言深信不疑受冤之人百喙莫辯是  
不惟捕役之誣良奇幻叵測而官之容隱扶同亦在  
天理人情之外嗣後凡遇此等案件官當細心究察  
以爲子孫留餘地故宜勒石垂戒

一抄搶之風宜禁也楚之爲俗強凌弱衆欺寡或因  
鬪毆傷命未經告官屍親統衆先抄兇手之家或小  
忿不忍因而投繯溺水亦率衆扛屍抄其與口角之

家甚或女嫁與人偶以別故自盡其母家亦率衆抄  
其婿家又江河兩岸有田之家修築堤塍逐年輪充  
堤長經管宜於農隙之時預爲堅築乃平日互相推  
諉一遇橫流泛濫水過於堤是非人力之所能捍禦  
而兇橫之族竟不思平日不肯齊力修築乃反以爲  
利率衆抄搶堤頭堤長之家并及其鄰里且謬爲飾  
詞曰不行救護其被抄之慘酷於賊劫家囊牲畜棺  
槨房屋樹木掃蕩一空旣而皆控於官彼稱殺人掘  
堤此稱率衆抄搶而州縣各官姑息含糊竟不按律  
究擬苟且結局此輩亦無忌憚故楚鄉有官法遠蠻



法近之謹今後若再有犯者地方官卽當嚴究律擬通詳以懲刁惡是宜勒石永禁

一強族阻葬之風宜禁也楚地惡俗每遇人家喪葬乃有借事生風者或賣地之人需索酒食稱賣陽不賣陰必不許葬或此地會經管業轉賣已經數主自稱業主需索酒食必不許葬或有田地相連欲圖買成片者或附近有墳屋者則稱碍其墳屋莫不統領多人或以糞穢澆潑其棺或扛病人強臥其穴需索者不滿其慾不止圖謀者不得其地不止大抵皆強族兇徒憑恃族衆魚肉鄉懦嗣後如有強族欺壓鄰里強於人家來龍白虎安葬者許其具控地方官親臨驗視不得委員滋擾一驗便可剖斷是非若係統兇阻葬需索酒食圖謀地土者立刻盡法究處不得少縱庶兇悍之風可息故宜勒石永戒

以上八條兩湖員役因循已久民生未輯每貽

皇上南顧之憂仰祈

勅部行文勒石永禁卽或有不肖官吏貪念復萌亦當顧石自惕且誰無身家誰無性命斷未有不仰體

聖心矢志清白而猶敢悖

旨自罹法網者也則是楚俗一變雍熙成風亦可謂久安



長治之策焉臣等因地方起見奏言甚繁貼黃難盡  
未敢另繕合併聲明臣謹會同湖廣撫臣年 偏沅  
撫臣金 合詞具奏伏乞

皇上睿鑒施行爲此具本謹會疏奏

聞奉

旨這本內事情前任督撫並未陳奏郭世隆蒞任實心除  
弊詳明具奏可嘉俱著照該督所請行該部知道

嚴禁濫派檄

巡撫 周名南

爲嚴禁濫派以甦民困事照得楚當軍需之後連年  
穀價大廉民之困於徵徭者愁苦呻吟鶉衣百結老

長沙縣志

卷之十七

政蹟

三

幼啼號不堪見聞稍有人心者處此必有惻然動念  
愀然不安矣卽正賦一兩非二十石穀不能措處夫  
二十石穀終歲之力去矣此外再無營運敲扑豈能  
免乎况於正賦之外苛歛使費雜差濫及或紙張或  
造冊或公費爲題爲名非一二端可指民力幾何而  
不逃竄流離扶老幼而他適也况苛歛之令論駐溢  
於常格凜凜功令煌煌告誡何等森嚴乃敢愍不畏  
死而借題巧取哉本部院三令五申舌敝穎禿其告  
誡可謂嚴且切矣近聞撫屬地方尙有悍惡不法違  
悖功令而借題攫取以作嘗試撞歲之具甚至有將



濫派不出紅票而開單私收甚至有將小民上納正賦而抵作雜派重收正賦者種種弊端殊堪髮指合再申飭爲此牌仰撫屬地方官吏知悉即便嚴禁州縣如有仍前私派苛歛假作公費種種攫取之弊從實開報除將衙役提拏處死仍將印官飛章叅處按賍計罪身名俱敗如該司道府廳不行查飭或知而不報一經發覺俱一體叅處此係奉

旨題定事例實非泛常再四深思豈可以自己之功名而代人受過哉

嚴飭徵收檄

巡撫  
周名南

長沙縣志

卷之十七

政蹟

三

爲徵收寓撫字有司知大體事照得錢糧軍需所係徵收固不得不急而催科寓撫字之仁則敲扑又不可不慎雖不能用一緩二一段愛惜之情有沁人心脾而不容已者愛之而實所以繩之緩之而實所以急之如以一錢銀明日可必完者今日立地追求竟有斷其肢體而斃其性命者夫以一錢銀而殺一命不可謂今日無其事無其人豈父母愛子之心哉何相殘之深也惟其作官不知大體而行事遂無法術亦非願死此人以其一怒之間筆楚之下遂不識有輕重矣民豈不畏難而愈滋其頑梗乎自然東逃西



躲一日全一日之生蓋畏之如狼虎遂避之如湯火也及至百姓逃躲乃不自咎其非遂聽衙蠹播弄作文申報上司不曰抗違勢同謀反卽曰毀罵官長毆打差人差佐貳官下鄉追徵差兵丁下鄉拘拏甚有巧害其民使兵丁下鄉與小民兌支者嗟乎賦不得完民不得生害人害己地方何不修而有此官也且不知愚民從不敢見官又安敢欠糧所欠糧者一二狡猾之徒皆其串通衙役有所憑依以愚弄其無知之官而無知之官不知狡猾之謀遂鼓其一朝之忿差兵差官此輩下鄉騎馬兵器勢如抄洗計此時救

燃眉之急將所完賦者又作供應打點之具官視民如草菅民畏上如雷霆上下岐視究竟只逋得此賦壞得此官官官相承而後人視爲畏途雖有善者無如之何矣何以相習相染而不自知自覺耶自今以後該有司以三次催完一限而零星收受亦不厭其瑣細收糧卽與紅票篤行慈惠之術深加體恤之仁禁其火耗勿混抵雜項有朝可以勉之於暮者有今日可以勉之於明日者不可恣怒而立斃小民於杖下陽有王法陰有鬼神

朝廷赤子敢視爲魚肉抑自顧其行徑可以殘刻否耶



合行嚴禁爲此嚴飭各官吏務使徵收得法催科撫  
字並行嚴左右剔蠹惡除真奸戒暴怒不得仍差佐  
貳官及兵丁下鄉催徵如有違犯除將佐貳兵丁拏  
來大法懲處仍將該印官飛章叅處該管司道府廳  
時加體訪有犯卽爲申究如悠忽不行摘發事露一  
并叅處仍按季取具各印官遵依勿忽

檄諭郡縣條規

總督 喻成龍

一堂規條約之宜整飭以肅官方也凡居官者內清  
其心志外肅其觀瞻原有相因爲治之理第心志在  
內人無由知觀瞻在外人所共見如堂規一則凡係

長沙縣志

卷之十七

政蹟

三

履任之初亦無不臚列詳明乃不旋踵遂已淆亂甚  
之承行書辦執卷上堂代問門子從後玩弄指示皂  
快於兩造對質之頃任意呼叱喝令滿堂嘈雜官同  
木偶以此釀毒流害不可枚舉彼衙役故意在堂上  
口兼頤指手並目傳希圖招搖撞騙此其害之流於  
外者已多至本官在堂上不能獨斷自主惟聽衙役  
調度則在署偷安可知卷案不自寓目幕客得以假  
手宅門家人呼應相通更易操權而自已職守罔知  
省察竟甘心爲衆手造成之木偶此其毒之釀於內  
者尤極慘烈也本部院方筮仕縣令時已知其堂規



不整實由此內外交病之故及歷十數任又往往聞其以此隕越者不少今故特爲提出爲吾屬告之該府並飭所轄各屬嗣後堂規照後所列規則一一遵行則耳目親而視聽專據理足以察情發言足以剖疑再加防範清夜檢點自不致出堂顛倒矣應於每日在署依時取閱卷案倘有餘暇與其玩物喪志毋寧考史鑑之經濟與其放言諧笑毋寧談百姓之疾苦與其延攬名勝毋寧採風問俗周知民務與其觴讌名歡毋寧勸農享社以課田功諸如職守所當爲者固不僅此數端惟在辨其職守之得失爲其得不爲其失則臨事之時自具神明變通不至錯悞然此皆在各屬返求於心以爲內省之端果其不以本部院之言爲迂錄置座右相爲戒約倣而行之更加精密則本部院固樂引爲同志也

一境內祠宇宜分別大小酌爲修葺以全治體也天下郡縣皆設文廟朔望行香春秋致祭此名教之宗主也至於其鄉之忠孝節烈生則盡人之道死則稟神之靈此名教之羽翼也本部院歷官以來所至郡縣於文廟重地已修者丹雘未修者鳩庀其忠孝節烈已祠者整之未祠者或製主而專祠之或進



立於他祠而附享之豈其宦有餘貲抑誠有不得不竭力爲之者蓋神人之共相往來其與治體相維者有在也該府卽轉飭各縣凡文廟不需修葺者令教官督率門役掃除如需修葺者作何捐輸會集紳士耆民議明修葺其忠孝各祠亦如之使其一境之人過櫺星之門肅然起敬羨之心謂苟有志於斯文者卽可入此門而登拜與夫過忠孝諸祠而亦動其懷慕流連之念豈不視政教之勸興尤有潛移默化之功歟所謂行其野阡陌以理則知由養興教入其國廟貌以肅則知服教畏神治化風行駸駸日上是

本部院之所厚望於各屬者也慎毋忽諸有無修葺之處均應造冊呈府由府彙送查核

一宜核舉節孝以維綱常也郡縣境內之治象有凜然而不做者必賴人倫之大端有以維之如有爲人傳說今某家有節婦則凡不節者知所愧矣某家有孝子順孫則凡不孝順者知所愧矣此節孝所以當舉以爲民勸者也然所舉不實或屬士論偏黨捏事實以具呈詞或屬富家夤緣希旌表以光門閥反致羣情不服無以動人爲節爲孝之感是以濫舉而失風教之準矣該府卽轉飭各縣一體遵行先須知倫



紀爲出政之本表正乃起化之原必由於官長躬行教化所以民間節孝常見於禮法之邦各屬果能實體此義而躬行之布告境內令舉節孝則在已先有一段真誠民間自不復敢以僞亂真誣飾於嚴父慈母之前凡有舉節孝至者必以遠近周知爲準須公同往請鄉紳畫押及傳訊鄉城各鄉約衆口僉同按其事實無論生存已故果有合旌表例者卽請旌表其不合例者果有節出於至苦至烈與夫孝子順孫無甚奇行而門庭歲月長慶晏如者本部院另行褒獎凡足以使人愧者感者皆其本於人心之事而事

之本於人心者莫如節孝果其舉之至當則人人皆各有一節孝之心相與奮興鼓舞豈各屬尋常例舉節孝以塞有司之責無裨治化者比哉有則核舉無則勿濫惟力行教化可也

一鄉城孤寡所宜收養以恤困窮也鰥寡孤獨乃無告之民王政必先施及居民上者當爲留意憫恤免致流離况時屆寒冬尤宜周急收養該府卽轉飭屬縣速將鄉城孤寡逐一細查內有係領孤貧錢糧者宜收入養濟院內該縣將應給米石衣布銀兩須照額編欸目按數實給務使均沾實惠勿得改折短尅



以及衙役侵蝕致滋號寒啼饑仍有不在領給孤貧錢糧之例者亦卽查收養濟院內安置倘未設有養濟院務須檢擇空間寬大公所寺觀等處查境內真正孤寡老邁殘疾之人收養大州縣約以五十人爲率中縣約以四十人爲率小縣約以三十人爲率每人每月量給制錢一百二十文務俾安置得所免致饑寒露宿此係爲政行仁之一端必須真心矜恤毋徒虛應故事至於埋骼掩骼及施湯藥絮薦之類又在良司牧推廣行仁不必限制仍將舉行月日并收養過花名數目造具清冊由府報查

一貧生宜加周濟以培寒士也士子株守一經別無他業或因家計貧寒衣食莫給卽欲勵志苦攻未免內顧分心每因膏火無貲以致志業不遂此等守志甘貧之士苦無所告深堪憫惻地方官若不加意撫恤何以濟窮儒而培士氣該府速行各學將貧寒生員擇其真正極貧資生無策者逐一查出申呈該府縣該府并該縣各酌量捐貲周急每年於青黃不接之時及歲暮窮冬之候兩次給送每次給與銀一兩米一石以資攻讀以勵操守惟是此等貧士多係負性耿介該府縣資給之時必須用帖傳送養其廉耻



不得褻慢喚領致無以發人觀感之心並負本部院  
培恤之意也仍將賑濟過貧生花名每年兩次由府  
造冊彙報查考

一修品好學之士子所宜優待也士爲四民之首爲  
政者取次培養如士類中有敗檢踰閑出入公庭者  
固當儆創其敦崇品行芸窻苦志之士宜加隆禮優  
待俾賢者愈知自愛而劣者亦自儆惕使庠序中漸  
相感化無莠亂苗則不特文教振興而頽風亦已維  
挽矣無如地方官因生員中有種生事之人遂致不  
分優劣一概輕慢以致文風漸凋士氣日喪該府須

長沙縣志

卷之十七

政蹟

四

飭各屬縣及各學教職等官嗣後凡士子有品行端  
方閉戶潛修者或於考課之日或逢朔望謁 文廟  
之時務必優隆相待以示鼓舞使士氣振興風教丕  
變有裨治政之道斯稱厥職其勿忽諸

一有司借用舖戶之物料宜禁也楚屬地方凡遇迎  
官接

詔及迎春讌會公事一切應用彩棚什物棹椅等項無不  
向舖行及甲長人等僉票借用稍不應付差役卽以  
抗法稟官義拏責治本官亦不查其來歷惟言是聽  
因而虎差藉端恐嚇需索銀錢酒食不一而足迨什



物各件用後名雖送還其實或使用朽壞或遺失無存或胥役乘機竊藏舖行人等無從追索只得吞聲隱忍嗟嗟舖戶以有限之資本應無了之借用勢不  
至於虧本傷生不已也該府卽轉飭所屬務宜實力  
禁除以安民生

一州縣推收過割藉端驗契勒索及積零加尾之弊  
宜除也查各州縣年終攢造花名實徵冊此冊由里  
書造送其里中田產買賣無不深知凡有推收過割  
者應聽從民便查各該管經承遇有過割輒行需索  
稍不遂欲則以驗契爲詞及至投契又以印契糧名

生法苛剝不准推收於是民間視推收爲畏途多有  
以本人之田地而仍寄原主之糧戶一有告訐皂白  
不分奸徒乘機影射或致因此失業真僞互爭訐訟  
不已是始因經承之需索終貽官民無窮之累也再  
如花戶實徵之內有釐毫撮勺尾數者竟不查照原  
額開造任意增填名曰積零小民不諳科則莫與爭  
辨及至通盤合筭逾於額徵者纍纍皆飽經胥私橐  
甚而經胥自己田地不納一絲一粟或又包收里戶  
錢糧俱鋪撒於花戶尾零之內迨至年終又摘出釐  
毫合勺欠數勒令倍完久而久之田地轉賣詭計飛



酒版圖安得不混爭訟安得不與該府轉飭所屬嗣後各於攢造實徵時留心體察痛革前項各弊剪滑蠹而甦民累佇觀成效

一稅契重索措勒之弊宜禁也民間買置田地每價一兩納稅三分則例昭然卽欲外取耗羨亦不過三分三釐而止有等不肖官役視置產之家爲可啖之嚮聽憑該管經胥一手握定卽使稅足耗足不卽印發生端勒索不飽不厭以致百姓甘向經胥投契而經胥又串同內丁包攬私收私繳止登私簿匿不轉報間有畏此弊害觀望不前者則爲漏稅恣意嚇詐

且業產牙行通行簸弄陷害無休是買產不能養生而反以賈禍矣該府須飭各州縣自行出示曉諭凡投契納稅者兌足正耗稅銀連契交投三日內卽行印發牌示本人當堂給領不許假手經胥恐其勒索如仍蹈前項弊端作何查懲務安民生

一誘拐囹騙之風亟宜懲革也聞得湖南客民每在湖北地方不惜多金價買人口以供使令有等不法棍徒三五成羣串成騙局哄誘良家子女自己裝作賣主寫立身約得價瓜分人口交割聽其上船或暗行賄囑關津盤詰或另作所誘子女之父母親戚追



趕盤獲趕到之時反謂買主誘拐與販必欲扭結經官預伏黨羽從旁勸解南客不識真假惟求脫身不敢復問原去之銀往往墮其計陷若輩倖售其術習以爲常遭其騙誘者不知凡幾間有買主識破此局買得人口或不告以歸期或寄頓別船載去以致良家子女多有陷身賤役者甚而喪心無耻之徒或指自己之妻子爲親戚或認零落之娼妓爲姊妹託言孤兒寡婦夫死欲嫁只求多金到手事犯駕空抵賴玩弄法紀尤堪痛恨該府轉飭該屬亟宜嚴加查禁立法創懲以安良善

一當舖之肥進瘦出按日加三宜禁也當舖之設原爲窮民之家通融緩急每月加三起息限滿變價作本此定例也近查各屬當舖名曰加三除本月之外有一日二日零期者亦算一月扣利且出銀不過九四九五每兩必輕三分二分進銀則要十分足色每兩必重秤三分二分是名雖加三實則加四加五牟利剝民甚屬違例該府宜出示嚴加禁飭嗣後須銀色戥頭出進如一其扣算月日有過十日之外者方許索利不及十日者不許接算庶使無計窮民得免一分扣尅卽省一分物力也



一催徵錢糧濫差之禁宜嚴也滾單之設原以速催科免差擾法至善也查有奉行不善者凡徵催民屯銀兩名雖設立滾單又不卽時印銷轉發在鄉民無由得知延至屆期出票差拏有正差副差更有持一必到籤者如狼似虎借端嚇索稍不遂欲則以一歲之額徵勒令一起全完逼拏到官留指守候動經月餘再如遠鄉花戶上櫃完納而坐櫃人役竟日閒遊燕飲不卽經收致使遠方窮民在城守候每至妨農失業此等弊端皆因該州縣不能勵精立法縱容胥役之過該府卽嚴飭所屬嗣宜加意剔釐留心撫字亦足以覘其催科之善否矣

一脚頭把持埠口之刁橫宜革也查得荊州沙市乃川蜀辰常松杉竹木總滙之所荆潛郢沔各屬之民赴彼買用應聽買主自行搬運近有遊手好閒棍徒不務生業成羣立黨號曰腳頭把持埠口不許買主自運概由伊等定價給與散夫擡送不論木植大小用夫多寡惟照木價一兩勒給腳價二三錢不等甚而外河人戶在牌筏之上買就由水路挽拽不用腳夫者而腳頭亦勒埠頭錢八九分不等方許裝運此等刁徒惡同地虎荊州沙市如此各屬之埠口亦可



類推該府轉飭所屬務將各境內埠口清查如有前項不法脚頭人等把持播害者嚴加查拏枷責並出示禁革該府仍取懲革緣由彙於歲終報查

一買賣田地三年不加補五年不回贖之例宜嚴也查楚省陋習有將田地價足契明絕賣與人者三年之外尙索加補五年之外仍勒回贖更有加至一而再再而三糾纏不已若買主不從輒以男婦坐家放潑吵鬧捏價不足告害拖累案牘不清深可痛恨該府應卽轉飭該屬如有買賣清楚田地刁徒仍踵前轍生端告訐者審實立拏盡法重處枷號示儆倘有將該有司以不職枉民罪之

一業甲阻隔車水宜禁也查田地附近湖河港汊者時遇大旱全賴車水灌溉有種刁悍業甲倚恃辦課名色於禁人取魚之外凡遇農家車水救旱輒亦藉端阻撓勒索銀錢穀石不則逞兇碎車聚黨毆人此種悍惡宜加察禁嗣後如遇天時亢旱農夫車水救濟禾苗敢有業甲仍前阻勒逞兇者該府嚴飭地方官立拏重懲以剪刁風



一經紀把持剝民網利宜革也查穀米柴炭民間日用之需有等射利之徒每年納帖錢一二兩不等討給府帖設立行分名曰經紀包在客貨斷定多少到客賣價任其高擡是客無利息民受苛求總爲經紀把持客民均遭困苦嗣後訪有棍徒討帖立行充當經紀把持客貨剝削民膏者卽飭地方官查拏懲處毋得因循以滋民害

一里書歛派工食之弊宜禁也里書之設原爲攢造實徵稽查糧戶之用若輩因而指稱造冊紙張飯食等費無一不藉端歛派假其名曰工食每里派銀若

干著爲常例州縣官以若輩爲寄耳目之人明知故縱致若輩恣行無忌歛派日增小民苦累不堪無從控訴該府身司表率與州縣最親此等情弊宜加體察力行禁革倘有抗違不遵仍行歛派者立即揭報以憑嚴提究處如果無派取情事仍將查明緣由彙復備查

一縣驛派民養馬賠馬草料短價之弊宜革也查各屬縣驛馬匹俱有額設料草馬價以供飼秣買補聞有不肖官員勒令里民喂養以及倒斃勒賠並發買草料虧短價值累民累行苛弊該府逐一確查概行



禁革不得瞻徇故縱致干併咎

一過往驛遞扣尅肥已累民應役之弊宜禁也查驛遞過往差使應付夫役俱有額設銀兩有等不肖官員扣尅肥已以充私橐仍派里民應役供差如有此種陋弊該府嚴行查禁倘敢故違立即指名詳報以憑叅處

一州縣城中各處柵欄巡夜支更自應在邑居民輪流守望文武各官責成兵捕嚴加巡警恐有不肖官吏藉倉庫牢獄城池重地派取里民出費名爲募夫應役之資實則科歛肥橐亦未可定該府應嚴加查

長沙縣志

卷之十七

政蹟

七

訪如有此等派累卽行禁革至一切水火人夫厨役工匠及掃除看守等項俱不得派民募應以滋擾累該府須實力嚴禁通取遵依存府

禁改折弊政檄

布政司

郎永清

爲遵諭陳言請賜裁飭以解倒懸以免流亡事竊照湖南半壁悉屬兵燹遺黎旣困於頻年軍興又苦於災傷疊見本司自蒞任而後目擊心傷不禁太息幾欲爲民請命柰拘於分而不敢上聞今際於斯有不得不爲之敷陳者查湖南七府二州歷來民困未甦幸於本年奉督撫部院特疏題爲楚民之元氣盡喪



業蒙

皇恩將本年錢糧蠲免十分之一共計免銀六萬七百三十八兩七錢零又蒙督撫部院軫念前此進勦西山背米死故人夫一千四百七十三丁題允奉

旨豁除又免同居父子第一年丁差錢糧是各屬殘黎沐再造之

皇仁感兩憲臺之恩於無既矣惟是衡永寶郴三府一州年來有粵鹽派及楚南戶口辦本輸課每府每年需本課十餘萬金而挽運搬盤雜稅尙不與焉又如長屬之瀏陽湘鄉等處因洪武初年墮糧之苦田少糧

長沙縣志

卷之十七

政蹟

哭

多科派條編幾倍別邑又衡屬之安仁耒陽有浮糧賦重差繁節年催徵尤艱屢據求請蠲減久蒙憲臺疏入部覆未允而子遺之困苦未甦詎意近來更有一苦如火益熱如水益深也因急爲本部院陳之查長屬本色南漕與盤腳正耗米共九萬七千九百三十三石四斗五升以近日之市價每石以三錢五分扣之止該折銀三萬四千二百七十六兩七錢零如糧道每石折銀一兩是共該銀九萬七千九百三十三兩四錢五分衡屬本色南漕正耗米共二萬八千七百四十餘石以市價三錢五分扣之共該銀一萬



二千餘兩今糧道折至一兩是共該銀二萬八千七百四十餘兩又岳屬之南漕正耗本色米共三萬四千一百四十七石九升以市價三錢五分扣之止該銀一萬一千九百九十六兩四錢零今糧道折至一兩共該銀三萬四千一百四十七兩九分有奇以上三府屬共額該南漕正耗米一十六萬七百九十一石五斗四升以市價三錢五分合而扣之總共該銀五萬六千二百七十六兩五錢零今糧道折至一兩則共該銀一十六萬七百九十一兩五錢有奇嗟嗟皮骨僅存之子遺去年因糧道之改折而號泣之聲

慘聞致今歲惟正之供尙多逋欠更何堪糧道之不照市價改折乎况衡屬更有辦納粵鹽課本十數萬兩之累乎夫以楚民元氣一案湖南通共僅免銀六萬七百三十八兩今糧道浮於市價額外改折銀一十萬四千五百一十餘兩是

皇恩蠲豁一分而米價加增數倍矣且查版籍額載止有部寺錢糧之外近河道府州縣方派南漕本色糧米至運米之時尙頒給行月水脚原未苦及斯民而全書亦未刊有改折字樣但糧道屢以折價未完勒催更兼以該道親臨追比官民急於折價有以正餉挪



解米價者有賣鬻妻子無門挈家逃徙鄰省者棄田舍而不顧置正餉而莫輸再如糧道止催徵岳長衡三府額設南漕糧米輕齎行月隨漕銀兩此外部寺錢糧毫不干預專聽本司催徵考成彰著甚晰今糧道將衡郴府州原無額設南漕駐防營兵月糧不以該道所徵糧米撥給又留作改折之數將本司三年分兵餉行令徑自支過銀四千七百餘兩買備營兵月糧任其移催不還迨至奏銷之後催之至再始以舊逋不能卽完之虛數抵算倘接年挪用不但欸項混淆懸欠無補加以糧米改折官民自是挪移正餉

賠償如任其年復一年舊借未補而新徵又爲挪用兵餉何術不誤是誤本部院與本司之考成猶小而貽害國計民生有不可言者矣且奉

上諭地方利害許其陳奏更正今糧道之改折雖與本司無涉但民力有限完彼橫折之銀未有不逋惟正之課矧本司有錢穀總漕之責雖糧米非本司任內之事然糧道乃布政司之官該道當爲公家起見縱奉文改折亦應移知查其地方之豐歉酌其米價之多寡具詳本部院並移本司會議妥確與地方無礙不致挪移正餉而後可倘萬不可行亦當通詳爲斯民



請命茲因部寺錢糧有挪移爲米價者有因米價並徵子遺賣鬻無門逃徙所致者是以不得不據實詳請本部院俯賜裁酌一面嚴飭該道或必不可免之事此時作何通融或照全書額載本色起解或止照時值改折以救其目前瘡痍之苦且查糧米一項先因本省兵糈無多又前此未經北運故有餘米或奉部文每年改折若干斯時應否除北運漕米若干止存南糧本色留支制營月米則兵可足食民無改折之苦事屬國民兩便惟在憲臺施莫大之恩造福於楚疆救億萬之生靈俯賜轉達施行等因奉批前據

府州縣申詳本部院已經嚴飭四年不許改折矣其所動司餉買米自當以時價算折亦當於糧道錢糧內補完不得缺項此繳奉此除另行嚴查並出示曉諭外爲照糧米止徵本色此從來之定制若改折米石不過一時之權宜斷不可致病民而病國倘照時值折價猶非有厲於民今糧米每石折價一兩不大倍於時價乎將民終歲勤動不惟餬口無資真救死不暇矣前糧道親臨催比本司不禁痛心扼腕卽欲爲民請命於上臺柰本司適值有撤回山左之行是以心欲爲民而未便故爾中止今本司已奉



旨復任豈忍坐視民困而不救任挪移正餉而不言今奉前批合亟通飭爲此備牌行府遵照本司檄行並撫部院批行事理即便通行並出示曉諭各屬嗣後南漕二米不行改折如未奉文之先糧道有行改折俱已全完者亦照時值之數扣算明白通詳各部院並本司及糧道即將長解之銀流抵次年糧米之數如尙有未完竟照時價扣算找解文到即將各屬完過南漕折價若干兩逐縣備造冊結徑齎本司以憑查核詳報本部院照依時價開銷如各該印官通同道差藉口折價勒索者卽指名詳報以憑轉報此本司

長沙縣志

卷之十七

政蹟

五三

爲國計民生起見該府當實心奉行慎勿遲延

申飭捏報墾荒檄

巡撫 盧 震

湖南地方盡屬兵火遺黎滿目荒殘實難遽成熟畝惟是在先勸墾方行因生捏墾之弊無墾旣稱有墾於是荒糧混作熟糧令民按數賠納嗣後包賠力竭漸至逃亡其實熟田並成荒畝是則因病生病致令現在窮民千辛萬苦歲額有欠敲扑難堪某自蒞任以來卽洞悉此害通行察訪後據彙詳逐將捏墾逃荒情節分爲二疏先後爲民請命復奉

俞允親臨踏勘減從齎糧冒雪衝寒涉川履險馳驅深林



密箐之中寢食風雪曠野之地所過郊原惟見敝廬  
星散民無全衣遇此號苦聞則酸鼻回長繕疏具題  
幸荷

深仁浩蕩如其所請已將原造丁糧槩賜豁免在殘民將  
起白骨之肉在荒邑始有席暖之官則民之未去者  
宜無去念未來者應動歸心但思各州縣從前捏墾  
逃荒兩項其間已賠錢糧或有按畝照糧攤派者抑  
或有不按畝數惟照糧加派者正須各印官熟察各  
自加派包賠之情事要知當日作何加派者仍宜作  
何減除况各數多寡真偽更應喚集里長冊書經承

長沙縣志

卷之十七

政蹟

五三

舊役並地方年老正人通查一切新舊圖籍從公細  
講清算如先有加今必照減倘有豪強先年未派包  
荒之數自應實減包荒之民不許移甲就乙不許偏  
輕偏重縣官吏即將單開豁免數目務期矢公矢慎  
詳加核算某某係捏墾錢糧應除某某係逃荒丁賦  
應減定要減除民間實賠錢糧毋容奸猾飛詭本身  
正賦纖毫皆歸至當不許少有不公算明減除數目  
逐一核實造冊取具里民甘結該縣印結由司總核  
報院以憑稽察如該縣受賄徇私庸闇不明但委經  
承書算通同豪強作弊多寡任其增減故使賠賦者



向隅徒悲反致不賠者私挪正賦或經訪實或經告發一切蠹役豪強登時拏問俱置重法仍將該縣飛章叅奏從重究擬決不姑貸

禁漕糧陋規檄

巡撫 趙申喬

漕糧上供

天庾輸納原有定數因江湖道險飛輓維艱交倉兌運費用非一不得已而議幫銀議幫米總爲漕務濟其窮非欲蠹胥享其利也湖南漕糧陋例上下通同官役分蝕任意攤派羣聚烹分小民脂膏腴削已盡上年酌減耗費似已清釐而民雖照議量減實則暗地增

長沙縣志

卷之十七

政蹟

五

加有僉派里民包收包解者有違例折銀多勒重價者有借端開銷以少冒多者更有私行賄賂以有諱無者大約所幫銀米費於漕糧者六七費於官役者二三種種蠹食全無忌憚而更可怪者糧道衙門乃係董漕專司卽爲侵漕弊數其經承則漕糧房有費派撥房有費篩颺房有費樣米房有費批廻房有費號房有費典承有費差役則管事差有費提糧差有費趕幫差有費查縣納糧差有費押兌差有費三班有費斗級茶房有費有索米索銀數石數兩以及數十石百餘兩不等此一絲一粒何一不從派幫而來



以派幫所出而飽此輩之腹窮民飲恨而不能言下屬畏威而不敢言漕弊之多先自糧道衙門始漕政之壞亦先自糧道衙門始又安望其飭禁州縣革除錮弊也今當新漕兌運將屆恐或怙終不改如有指稱漕糧派撥篩颺樣米批廻東號典承以及管事提漕趕幫查米押兌三班斗級等名目不遵法紀不顧身命需索陋規措勒漕費者據實首告立即鎖拏杖斃并將該道以縱蠹殃民糾叅如敢通同徇隱察出一體治罪

飭減糶救荒檄

巡撫 趙申喬

長沙縣志

卷之十七

政蹟

七

州縣存貯倉穀有春借秋還之例原使實在窮民借領運回庶贍八口以資東作長衡二屬上年雨澤愆期收成歉薄况下江時多搬運以致本地存積甚少且富豪之家擁穀堆積坐待長價更爲喪心不良近日市米騰貴窮民度日維艱聞之食不下咽夫春間原有出借之例有司若能實心檢察自使饑民得沾實惠今聞各州縣劣衿棍蠹乘出借倉穀或捏名冒領或借索行私無告窮黎莫不向隅而地方官惟憑奸猾侵蝕毫無顧忌是出借之名甚美而其實無益是與其循例出借徒飽棍蠹之囊橐莫若減價糶賣



以救窮民之饑餓也長衡二府屬上年出借穀石秋成未經還倉之州縣舊穀既尙逋欠今年難准再借應以現在一半應借之穀值此青黃不接減價糶賣實在窮民如或不足再將應存一半內減糶十分之六七州縣不得假手家丁胥役致滋混冒及需索短措使窮民裹足不前其上年秋成已經還倉之州縣應仍照例一半出借一半存倉備賑至減糶之弊亦不一端或虛報糶數賺利肥囊或縱容奸商地棍多買轉販貧窶小戶反不得升斗充饑殊堪痛恨不知地方設立有司所司何事觀此熒熒赤子不爲竭力

軫恤更以

朝廷救災之倉穀攘爲貪污分潤之機緣此等不肖雖存皮肉全無心肝卽上司耳目有所不及一時法網或倖得免而天理難逃必遭絕滅子孫之禍救急如救焚不得不痛切言之其轉行嚴加申飭各存一分真心行一分實事毋謂紙上空言不以白簡從事甘被若輩之欺朦也其減賣價銀令各州縣同同城武弁教官佐貳首領封明貯庫取結報查不必轉解致滋往返如有侵虧卽將出結各官一并叅究仍將糶過穀數銀數報明俟秋成飭照時價買補或價有贏



餘并買穀入倉備賑總期私弊盡絕窮餓稍甦不勝  
爲賢守令望之各宜三思祇遵共畏王法冥誅毋得  
負人適以自悞也

嚴禁濫差示

巡撫 周名南

爲嚴禁濫差以除民害事照得濫差之擾本部院疊  
次嚴禁不啻再三肫切靡所不備悉矣且屢經廷議  
條奏奉

旨申飭一切細事俱不得濫差一人下州縣近訪得各衙  
門差役此往彼來源源絡繹不絕索轎索馬索夫索  
錢州縣官供應不暇有忍氣吞聲者卽有一二申言

長沙縣志

卷之十七

政蹟

七

稍有阻抑其兇鋒而播惡造事者有不滿其欲而遂  
駕惡言以趨本官之怒者甚有不肖上官竟差內使  
家人跨馬持矢飛躍如狼如虎徑赴州縣挾以不得  
不從之勢或借小事而播爲大事或將大事而改擬  
小事假顛倒王法之具以爲營私攫取之方暗去明  
來怒罵嘻笑無非婪賍飽壑之具嗟爾此輩眞不知  
禍之速取也前本部院勒石令該州縣官查有不干  
政事之差徑自鎖拏申送曾未見有揚眉吐氣間有  
一二申報細議以事出萬不得已終屬吞吐而反開  
異日歛怨之端此皆上官庇護忌刻之所致也合行



再爲嚴禁爲此示仰該司道府廳官吏文到即便鈴束衙役家人不得濫差私下州縣作惡害民敗官常而亂法紀究且自墮身名竟何益哉仍將濫差不法之徒訪拏申報以憑大法懲處如州縣官將上官之濫差申送卽註本官以實心愛民之考如司道府廳將不法之差懲處申解亦不失爲桑榆補過之收但能奉行爲民除害亦當寬其自新之路如再陽奉陰違依然濫差下鄉下州縣索騙民財凌耻印官一經告發或別有敗露定行特疏糾叅悔無及矣

禁火耗雜費示

巡撫 趙申喬

長沙縣志

卷之十七

政蹟

五

照得湖南地瘠民貧苦累不一其最賤虐而可痛恨者莫如橫行私派與重收火耗二端本都院向在江浙久悉傳聞上年會審紅苗一案經過地方留心察訪更得其詳大約正供之外巧設軟擡公費腳價諸名目有按糧每兩加派三錢至五錢不等者有借稱公務逐事私派一年之內難以數計者地丁銷算有派驛站銷算有派刑名費用有派漕糧南漕費用有派甚至州縣到府與府廳到省無一不派上司生辰令節與新官到任鋪設過客下程代儀無一不派且地方官之食用物件有發價之名無發價之實亦無



一不派况衙門之蠹役恣其需索經手之里胥任其操縱是官之所得者一而下之所出者不至於二二三不止又花戶完納條編重戥稱收每兩加耗二二三錢不等嗟此熒黎敲脂吸髓未飽虎狼剝肉剝膚誰憐鳩鵠無怪顛連困苦日卽於流移死亡而莫知究極也我

皇上仁覆遐壤慮切民艱本都院陞辭之際親承

天語特頒

諭旨嚴飭大小屬員痛改前非洗心奉職力減加耗盡革

長沙縣志

卷之十七

政蹟

堯

私徵務使流移者復返鄉間守業者獲安隴畝以副朕軫念遠省民生至意欽此跪捧

絲綸湖南數百萬生靈感沐再造

皇恩永永頂戴與天無極矣本都院蒞任之日卽恭設香

案宣讀

聖諭仍謄黃刊布通曉官民一體欽遵外誠恐不肖官役利慾薰心罔知洗滌甘蹈法網有負

聖天子浩蕩洪慈合行出示嚴飭爲此示仰府屬官吏軍民人等知悉湖南百姓困於橫徵已非一日今我

皇上洞燭情弊嚴行警飭且姑寬既往許以自新誠爾等



官吏悔罪爲福之時也本都院忝任撫綏躬膺表率  
若仍聽積習相沿不爲小民尋一生路上辜

主德下拂民情本都院雖死葬江湖不足塞責昔人有言  
一路哭何如一家哭嗣後如該地方官不遵

諭旨怙惡不悛擅於額徵條編外私派分毫及仍前重收  
火耗剝削小民逢迎上司而司道府廳亦利其贓私  
通同徇縱是誠不畏刑法也是誠不顧子孫也本都  
院心清面冷立刻叅拏追贓治罪斷不稍避嫌怨姑  
爲寬假使髓枯赤子終無求活之門膽大貪官仍享  
恃入之利亟宜省改無隕身名特示

長沙縣志

卷之十七

政蹟

李

禁徵糧陋弊示

巡撫

趙申喬

爲再行嚴禁徵糧陋弊以恤民力以澄吏治事照得  
湖南私派橫行而加耗亦較他省爲重本都院恭膺  
簡命來撫此邦期與屬員洗滌舊污共砥清白奉法愛民  
仰副

聖主軫恤黎元至意又念小吏不廉總由大吏不法而端  
本澄源當自巡撫始所以甘心淡泊不敢以寸絲粒  
米下累屬員天日可鑒耳目難欺凡居民牧諒宜共  
體但漸染已深矯正不易潔已自愛者固不乏而嗜  
利忘身者亦不少今當康熙四十三年錢糧開徵伊



始誠恐從前陋弊未克盡除上負吾

君下負吾民以重吾咎合再出示嚴禁爲此示仰撫屬官  
民人等知悉凡徵收正項錢糧務照全書起派數目  
令小民自封投櫃如或奸頑抗餉卽行照冊按欠拘  
比不得仍踵前弊私徵重耗僉點單頭苦累小民倘  
有不肖官蠹不遵飭禁貪黷如故或經訪聞或被告  
發官則叅處蠹則杖斃決不稍貸如本都院表率不  
端以至敗行貪濫任爾官民指實控告本都院願甘  
顯僇以謝湖南數百萬生靈爲不肖巡撫戒言悉由  
衷法無曲貸各宜凜遵慎毋忽視

長沙縣志

卷之十七

政蹟

空

禁上行下效積弊示

巡撫

趙申喬

照得湖南僻處邊徼疊遭兵燹雖

聖恩浩蕩蠲恤有加而民氣凋殘瘡痍未起所賴身任地  
方者滌除苛政悉意撫綏庶幾哀鴻可集共享昇平  
我

皇上聖明遠照洞察民艱特以重耗私徵  
天語叮嚀務期釐剔本都院欽承

諭旨已經給示分發飭禁在案但州縣亦邀一命豈真愍  
不畏死所以橫行而無忌總由上下之通同郡守者  
州縣之表率也今湖南知府以及直隸知州於所屬



起解錢糧不論地丁南漕驛站每百索銀三兩或名  
驗批或名硃資或名公堂或名過平名目雖殊婪贓  
則一又加奏銷一項該管府州亦惟逐項追求每縣  
每項勒索規儀四十八兩六十兩以至一百二十兩  
不等檄催差取公然勒索再如盤察倉庫原杜有司  
虧空而承察府州每小縣索取常規一百二十兩大  
縣索取常規二百四十兩惟較餽送多寡不問倉庫  
盈虛此外種種苛求更難悉數知府直隸知州取之  
州縣則州縣不得不取之百姓借劍而殺其非自殺  
之一間耳知府直隸知州如此更進而上之諒有  
長沙縣志

卷之十七

政蹟

空

同心無待言矣伏讀

御書親製督撫箴云曾是源濁而流則清曾是表正而影  
則傾大哉

皇言其戒勗督撫之意深矣切矣然則處茲地而言澄源  
端表之道當自巡撫始巡撫貪則屬員安得不貪屬  
員貪則窮民安得不逃而且死也本都院身受

隆恩殫心報効先以一已爲屬員倡合行出示曉諭爲此  
示仰府屬官吏軍民人等知悉如巡撫稍有不肖之  
念或有非法之事爾等官民卽當共聲其罪以爲負  
心狗慾之戒倘本都院正已率屬自問無愧而爾等



屬員仍然需索下屬尅剝小民使

天恩不被遐壤殘黎獨抱向隅本都院嫉惡如讐斷不能姑留敗類日媿民膏霜簡一登身名俱喪亟宜猛省毋貽後悔

除蛟害示

按察司 周人驥

爲飭除蛟害以安民生事照得楚南襟山帶湖每多蛟水爲患人畜田廬隨波漂沒每歲有之近又報衡永等處出蛟聞之殊爲憫惻考之紀載得伐蛟之法蓋蛟以卵生數十年而起生蛟之地冬雪不存夏苗不長烏雀不集其土赤色其氣朝黃而暮黑星夜視

長沙縣志

卷之十七

政蹟

奎

之黑氣上冲干霄其卵入地自能動轉漸成地泉其形旣成聞雷聲漸起而上其地之色與氣亦漸顯而明未起三月前遠聞其聲如秋蟬悶在手中而鳴又云如醉人聲此時蛟能動不能飛可以掘而得及漸起離地面三尺餘聲響漸大過數日一經雷雨穿山破岸水逆潮湧而害不可勝言矣善識者在春夏之月觀地之色與氣及未起二三月間掘土三五尺其卵卽得其大如甕其圍至三尺餘先以不潔之物鎮之多備利刃剖之其害遂絕又有說用鐵與犬血及婦人不潔之衣埋其地以鎮之蓋蛟非龍引不起龍



非雷震不行鐵與穢物所以制之也又有說蛟畏金鼓夜畏火夏月田間作金鼓聲以督農則蛟不起卽或起而作波但見火光聞金鼓之聲其水勢必退又云蛟畏荆樹蓋荆汁可以治毒蛇也又云夏秋連日雨夜則豎高桿掛一燈籠亦可避蛟諸說頗近理論爲政之大體自以修德行仁爲挽氣化弭災眚之本然爲民父母之心無所不至不得不多方救濟以冀萬全踵古人而行之或有補於萬一况職司民社有撫恤之任明明有弭災之說豈可嫌其迂濶而靳傳布乎故錄各說通行爲此仰府州官吏卽便轉飭所屬將伐蛟之法通行曉諭苟能伐得一蛟卽免無窮之害縱不能全弭其患亦當竭盡此心慎勿視爲不經而泛視也

觀風示

巡撫  
李因培

星沙列象珠囊輝軫水之墟嶽麓蟠形繡壤判荊州之域眺七十二峯之勝概秀盡楚天開三十六折之洪波靈涵秋水至於南嶽虞書傳如岱之稱觀乎天文周易演重離之位樂張洞庭之野鼓吹風雲碑留岫嶁之巔昭回日月粵自熊繹受封而後迄於定王胙土以還甘棠爲雅化之遺謳思勿替檇杙實編年

長沙縣志

卷之十七

政蹟

畝



之作文獻猶存鬻子獨冠老莊會作岐周之傳楚語  
時同謨誥間登洙泗之庭代有傳書稟經酌雅人多  
傑構摛藻揚華旣作述之相師亦體裁之代嬗其言  
有物能讀典墳邱索之書所寶惟賢實逾齒革羽毛  
之產金簡啓玉函之秘靈蹟非誣湘臯拳杜若之英  
瓣香弗絕得風人之遺意離騷亦可名經託神女以  
攄懷諷諭因之作賦招靈祠畔景差好事之徒濯錦  
坊邊賈誼著書之地洵得江山之助應開吳越之先  
劉巴專誥冊之長榮緒紹修明之業過羅含之宅夢  
鳥成文登武子之臺囊螢績學成都內史風流不減

於王澄荆楚仙人雅譽見推於范述潘京善辨合號  
譚宗谷儉無師獨膺高第十年古鏡呈皎魄於毫端  
一夕清湘衍春波於筆底不特八龍競起郡邑騰驤  
從看大貝芸生江濱照耀伍安貧多聞博雅屢降元  
纁歐陽顛習業專精洊膺紫綬蓋衡品於三分之日  
公衍非修飾之流若論才在六代之間徐偉爲振興之  
杰薄齊梁之弱體師燕許之高華士誦張公守岳之  
文人賡元結摩崖之頌那律號九經之笥史青誇五  
步之名石鼎連吟譽延昌黎之序雲岩作記鑣揚賓  
客之詩秋田居從事之班詞工牒諭羣玉授校書之



職表進篇章五老同登曹松極愛閩仙之咏二晁並  
駕明畧無慚國士之稱連唱和於東坡蘇堅似浙荷  
表章於永叔廖倚歸秦至覃季子乃纂微言尋源子  
史惟周元公更傳絕學探本圖書函一脈於濂溪起  
二程於洛水易被深通於周禮龍榮精詣於春秋載  
道爲文非徒鼠獄雞碑之技名言寓理直揭天根月  
窟之源風雅山林彭子家里居是式威儀粉署劉朝  
瑞遺像猶存西涯開七子之先居臺閣而斯文自任  
元吉負四朝之望因幼孤而力學彌勤風景羅羅萃  
玉淵於魯府覆瓿種種窺筆帑於他山哀勝國之遺

長沙縣志

卷之十七

政蹟

奕

經金臺表碣昭熙朝之雅化玉笋分壇或承恩於豐  
澤園中或稱旨於長春苑裏蜚聲洱海鶴泉友水之  
篇領袖瀛洲文肅藏珠之賦莫不希風千古閑矩獲  
於先型庶乎服教百年躋冠裳於大邑本部院通籍  
北院授鉞南邦每握金針動涼飈於月屋頻持玉尺  
移寸晷於風簷照澈冰壺拂拭不移於遠近張回鐵  
網搜羅已遍乎東南士風原係乎撫綏文治亦通於  
政教頃來夏口方窺墨浪於晴川茲度昭潭用測文  
淵於北渚望氣識瘞文之塚臨流尋洗墨之池錦水  
流輝秀異實鍾於沅澧巴邱問俗風聲不隔於荆襄



勤民固勿忘初心教士非徒循故事梅花載道封題  
憑驛使以俱馳泮水開水授簡自膠庠而弗緩和奚  
云寡高歌白雪之詞神與偕來妙擅清峯之句奪三  
春之藻麗斑管初拈窺二酉之精英牙籤初劈此日  
名標兔冊固將玉女以有成他時價重龍門應信起  
予之不謬

嚴禁長屬收荒店示

知府 呂肅高

爲嚴禁窩贓之荒店以靖盜源事照得省會之地五  
方雜處最易藏奸窩竊不除民難安枕本府下車以  
來訪得省城內外一種扒賊日則沿街挨戶剪絡拘

長沙縣志

卷之十七

政蹟

七

摸夜則挖壁穿牆攫贓肆惡偷來什物急圖銷售卽  
有一種荒店舖內擺設零星舊物名曰買賣其實專  
收賊贓公然窩囤被事主認獲向贖肆其索詐稍不  
遂欲反逞兇橫毆加以誣盜嚇制事主目覩真贓畏  
其兇惡莫敢過問扒賊恃其荒店恣肆無忌是荒店  
實爲民害久經前府查禁無如捕保受賄徇隱仍然  
縱令開張此等奸宄若不禁逐流毒何極除行長善  
二縣委員查禁驅逐外合行出示嚴禁爲此示仰荒  
店人等知悉爾等既有資本皆可營趨豈容托名荒  
店收買賊贓示諭之後爾等速宜以業另謀生理毋



許開設荒店名色自羅法網倘敢故違一經拏獲定  
照盜賊窩主例本府言出法隨決不姑寬毋貽後悔  
至該管捕保如敢受賄徇縱不行查逐稟究察出一  
併重處各宜凜遵毋違特示

嚴禁長屬喪行吹手勒索示

知府 呂肅高

爲嚴禁喪行吹手分界勒索之惡習以除民害事照  
得各行交易均聽民便豈容盤踞壟斷勒索害民本  
府訪聞省城內外一種遊棍或三五人十數人各出  
微貲合制喪扛分立境界凡有喪事不許越界租賃  
若輩盤踞其家需索酒食孝帛利市及扛擡棺柩不

長沙縣志

卷之十七

政蹟

奕

論遠近任意索錢或三五串十數串不等如喪家另  
覓則又以分界爲辭串同一氣彼推此諉百端苛索  
稍不遂意輒肆詈罵挾制卽僱夫亦遭凶阻本家旣  
不敢越界他覓不得不忍氣吞聲厭其壑慾方得安  
靜又有吹手一項效尤其弊遇有婚喪亦復分界勒  
索每日四人或索錢八九百千餘文不等視爲奇貨  
牢不可破夫喪車吹手民間必需之事若輩竟爲魚  
肉此等惡習深可痛恨本府訪聞旣確姑寬已往除  
酌定應給錢數並傳行長善二縣曉諭外合行出示  
嚴禁爲此示 喪車吹手人等知悉嗣後毋論城鄉



婚喪任聽王家隨便租賃不許分界勒索如喪車一架止許給錢一百文擡夫計程十里每名給錢二十文吹鼓手除酒食外每日每名給錢二十四文迎送按程十里給錢二十文均計程途遠近加減永定成規倘敢不遵示禁仍前分界勒索許被害之家赴府稟報以憑盡法究處決不寬貸各宜凜遵特示

勸民開塘示

知縣 朱前詒

爲勸民開塘蓄水以資播種以厚民生事照得地有肥磽時有水旱惟藉人之經畫有方蓄洩有法卽或猝遇旱潦亦可有備無患查長沙雖係水區實皆山

長沙縣志

卷之十七

政蹟

充

田前本縣搜採楠杉親歷所屬地方一望草崖棘道竟少水窟塘渠田卒污菜生利甚鮮皆由爾民不知開塘蓄洩所以山水沖流一往不返幸而雨暘時若栽禾歛穀取利一時不幸蹇值旱乾稻枯土裂豈不可惜殊不知生財之道全資地利地利之獲半由人工種植失宜收穫必少曷若取法江南富庶自易江南原無別法不過因田之高者則種黃豆黑豆芝蔴棉花田之低者則栽黍稷稻梁早晚禾麥播種旣多收成亦廣男耕女織家給富饒實本於此今見長沙地方曠土漫行人居寥落所種之田止靠栽禾栽禾



之外毫無種植卽餘穀石能值幾何僅堪完公雇役  
那有剩資贍口毋怪乎終窶且貧動輒逃徙他鄉也  
本縣日擊情形心如芒刺夙夜籌思特爲爾民開一  
生財之道莫如多掘塘渠約量深淺寬濶逐里蓄水  
或栽菱藕或蒔芡蘆近於水者栽禾遠於水者或種  
各色豆麥或植各種藥材皆可取利大率三十畝田  
以二十畝栽禾以八畝種豆留二畝以種果芋蔬菜  
等項按時播種早晚灌溉便可取利養家歲有凶荒  
土產雜處不得於此卽償於彼有餘可以餉親族入  
市可以易錢幣桑麻可以資女工何等不樂况王政

長沙縣志

卷之十七

政蹟

七

有制其田里教之樹畜一家養母鷄五母彘二又昭  
昭可信者爾民依此而行自然家食充足諺云多種  
多收種瓜得瓜種豆得豆此之謂也總之勤儉爲上  
農怠惰爲游民開塘蓄水多藝五穀收穫必倍此實  
爾民經久營生之業本縣一片婆心不憚饒舌爲爾  
民諄諄勸導務須各自努力乘此閒暇留神農事萬  
勿以爲迂設視爲紙上具文也倘里有游民不務生  
業自暴自棄者許地方鄉耆人等指名稟報以憑立  
拏懲儆斷不姑宥

革除甲催示

知縣

王克莊



爲甲催之弊害已深亟行革除以甦民困事照得長  
邑昔年俱用額遞充當里役原有挨管催徵之法自  
吳逆播毒因苦已極恢復之後漸次釐剔改編通縣  
爲十都都各十甲以統十區區內分列糧戶姓名雖  
聽民自行上納而舊轍因循仍立有甲催之目近年  
以來凡徵收錢糧惟甲催是問本縣蒞任之初見各  
甲先於年前冬底開報下年輪役姓名紛紛投遞及  
照例差喚赴認無不哀號稟訴以祈換免不啻廵於  
湯火細訊根由始知累害實甚查其大端有四而其  
中委曲難堪未易悉數也一則有舉報之弊查實徵

規則每甲均糧三百六十餘石每析三十六石零以  
畫一區甲內十區各戶除紳衿上役不在應役之列  
外凡有三石六斗以上戶糧者卽應報充一年之甲  
催令將甲內十區各戶錢糧按數催完至年終卽將  
第二區花戶應該輪役姓名挨報作下年之甲催其  
報也公則奸民有不願充應者告訴糾纏不已其報  
也不公則有挾仇憤受賄囑漏富差貧等弊及報名  
已定二卽有著役之弊票喚承認差役要錢央人躑  
保保結有費拘牽伺候強半在城三則有提比騷擾  
之弊各戶錢糧旣經一身承催如完不敷數卽行差



拏差役不問欠戶而甲催獨受追呼籤票疊至來去  
絡繹酒食使費一年供給雞犬爲之不寧妻子甘爲  
奴隸四則有拖累血比之弊區內零戶豈盡淳良散  
處四境則有奔走唇舌之勞瘁頑抗不完則有按限  
代比之敲扑刁頑赤貧經年拖累年復一年糜血肉  
而廢生業傾家了命賣男鬻女尙可言哉嗟此黎庶  
皆吾赤子若不亟爲革除一掃積弊不啻身受心痛  
寢食難安合行曉示爲此示仰縣屬糧里軍民人等  
知悉凡從前報過本年甲催姓名牌票冊籍盡行銷  
燬嗣後永遠不許再行舉報且本縣於正賦之外原

無纖毫私派一條編徵頭緒清楚爾都甲糧戶各將  
自己名下錢糧照依額定之數遵限自行上櫃完納  
不得故意拖欠亦不得轉托他人并不得包攬別戶  
銀錢拉扯侵蝕如有此等恃頑抗違立即差拏嚴行  
究比照數全完蓋前此積累旣除省却幾許妄費享  
却無限安寧務期返淳還樸急公自好毋違特示  
飭禁派累各款告示

巡撫

陳宏謀

爲嚴禁派修事照得水陸塘汛所設墩臺營坊等項  
理應隨時脩葺庶足以資防守而壯觀瞻楚南塘務  
經前督部院阿 具奏除向來交代者仍著落各州



縣修整外其應行設立而廢置未舉者請項修理修整  
之後兵丁住房應令自行修整毋得推諉其官廳墩臺  
望樓等項照依定例文員修竣移交營員收管至大路  
塘汛亦經前督部院新 題准部覆動項修建保固三  
年之後如有些小損壞責令兵丁自行苦補設遇風雨  
坍塌移明文員修葺又於乾隆十四年十一月內准  
欽差咨奏明飭著各地方州縣官員將境內各汛塘坊墩  
臺量視衝僻循照舊例捐貲次第修理嗣於二十年  
本部院前任內將塘坊望樓責成地方官修理奏奉  
硃批札司移行欽遵在案是塘坊之損壞責在州縣修葺歷  
長沙縣志

卷之十七

政蹟

三

有例禁茲本部院過衡衡陽民譚予吉等具呈塘坊派  
修前經勒石禁革詎年久碑裂竊恐人心不一復行滋  
擾等情核其情由雖現無大派累似工竣領銀不免賠  
累合行出示仰闔屬官吏軍民人等知悉嗣後遇塘坊  
望樓損壞地方官照例捐貲專差丁役購料雇工修整  
交兵住守如小有殘損聽兵自行苦補毋得派累附近  
居民承應工作如陽奉陰違一經發覺定行叅究 司  
道務須稽查嚴禁切勿姑隱慎之毋忽須至告示者

勸諭貧富相通示

知府

張五緯

爲明定貧富緩急相通之義永除刁告永便貧民事



照得官典之設原所以裕

國便民長沙十二屬除安化歷未開設典舖外其餘各州縣雖開設多寡不一然不過城廂市鎮居民及附近之庄村可以隨時質押他如窮鄉僻壤及百里之外居民既憚路遠兼乏盤費卽難於往質孤老孀嫗勢實難於遠出書生少穉更不慣於奔馳況因數千文數百文錢斷不肯向數十里數百里外之當舖遠行質典是以民間向遇典舖遠遠卽就近在本村富戶或鄰里有力之家持物押穀於秋收後照例加以息穀本利清還此係鄰里緩急相通鄉民救急善舉

長沙縣志

卷之十七

政蹟

七

也間有地方棍徒勾通衙門蠹役藉端訛詐或無耻借戶侵虧本利挾催迫之嫌誣告圖賴遂有私開典押之控到官勒令繳簿被告畏不敢呈以致案懸不審時保時押或屢審而不能結或未審而遞息完案其中情弊不一以致鄉間有力怕事之家不敢貪圖微利致起訟累且貧民青黃不接或遇水旱歉收其家內無升合分文室中有妻兒老小嗷嗷數口共受饑寒迫於無可如何之時恐不免作亡廉喪耻之態似此等風俗相沿人皆謂富戶之刻視貧民不知貧民實受棍徒之害殊非藉富養貧之道更非教養生



成之法欲使濟急貧民須知培養富戶明示以質穀  
並無私押之禁自然永絕棍役串詐之端本府業已  
議稟各憲奉會詳批允通飭遵照在案合行出示曉  
諭爲此示仰閭屬軍民人等知悉嗣後凡係糧戶積  
穀之家如願益人利己者不妨質押以通緩急如積  
穀無幾僅足自饜不敷出押者自不便強以所難卽  
積穀盈倉之戶而經理乏人或不長於應付者亦應  
聽其自便若平日精於理財善於生發與其待時而  
糶干犯囤積之條莫若半情半利全已全人共行此  
兩有裨益之舉且旣經本府通行曉諭行縣立案之

長沙縣志

卷之十七

政蹟

七

後可再無控累之虞但寧以義爲利之恆足莫作巧  
昧以欺天男婦一律童叟無欺共體備籌剴示之苦  
心咸臻安居樂業之順境是又本府深望於爾輕利  
重義之糧戶輩也如有強押勒贖以及保甲侵挪藉  
端滋事者許爾糧戶等執簿呈據近則赴轅稟究遠  
則赴所在地方官呈明究辦各宜凜遵毋違特示

禁止淫祀糜費示

張五緯

爲曉諭淫祀無福之義以崇根本而節糜費事照得  
聖化成民而致神人道尊親而遠鬼首務教孝勸忠之典  
次及春祈秋報之文所以順成蜡通已寓爲民謹財



之義而不歆非類尤切非鬼戒諂之訓也本府前蒞岳郡查得民情最喜媚神邀福每遇迎神賽會不惜重貲披閱郡志初因家計有餘一時迷悟遂充主會執事等役一經承值鄉市目爲年例及至家道中落諉卸蔑由竟至釀爲流徙志乘詳載情屬可憫當經出示禁革並議稟撫憲批示飭議旋蒙藩臬憲會詳允准通行在案茲本府奉委署任以來訪聞長郡俗習不異岳州獨不思祝以孝告嘏以慈告應祀之鬼神尙必本孝慈以昭格孔子云未能事人焉能事鬼推原其意人必盡力於倫常然後可以將敬於應祀

之神他如不孝不慈不愛不敬不和不睦卽家祀祖先尙且吐之不暇非分之鬼神豈肯因其一念私媚之忱遽爲降福况鳴鑼擊鼓不過快意適觀從事於斯者更未必盡出諸誠敬乎至於邪神厲鬼或貪血食之馨祀典未登斷不能冒達下情於上天非禮勿享洵爲至論爾民何不節其迎神賽會焚香點燭之貲豐菽水以事父兄施衣食以睦鄉里行各種實在之功德省向日虛無之祈報不以有用之財浪供無福之祀根本旣崇報施自應作惡必滅爲善必昌從未見就一日之祈禳可能倒置也本府職司表率軫



念愚蒙除通飭各州縣一體出示禁革外用特剴切  
曉諭爲此示仰闔屬士庶軍民諸色人等知悉爾等  
嗣後務宜各親其親各長其長求恩義於倫理之中  
節費用於迎祭之習毋得再蹈故轍輕費貲財僥倖  
求福自貽終窶之累倘有不肖之徒妄希就事生風  
或以迎神邀福爲由引誘良善冀圖歛錢入己飲食  
徵逐並不法僧道倡言某神能拯疾病撞騙募化且  
或神奇其說捏爲顯靈發猖等論誑人財物一經本  
府訪聞定卽查拏按律究辦斷不稍爲寬貸爾等務  
須仰體諄諄告誡苦心共敦根本以一己之修爲感

長沙縣志

卷之十七

政蹟

七

鬼神之功用將見百福駢臻千祥雲集也各宜勉旃  
條陳利弊詳

知縣

朱前詒

捧讀

憲檄仰見

憲臺愛民恤民好問好察之盛

心但屢奉頒示條約湖南利弊光已洞悉靡遺屬在  
小吏只有恪遵奉行豈能別有蠡測恭遵明問敢竭  
芻蕘謹爲 憲臺陳之

一流民之宜嚴查也湖南地瘠民貧兼遭吳逆悖亂  
盤踞日久殺擄逃亡惟長沙爲甚幸蒙

天兵勦滅海宇清寧且各

憲宣播

皇仁招徠撫綏流移漸集瘡痍之民稍有生色然稽查戶



口逃散四方尙多未歸所以村居寥落田土拋荒年來司牧非不加意招墾搭房給種然不過就近勸諭未能遠達以故來者甚少今請 憲臺威靈檄行各府州縣傳諭鄉保逐戶挨查如有湖南州縣流民附居其地者除奉 文安插弁官不計外其餘一概查明何州何縣人氏遞押各歸原籍有司量給草房以棲其身措給牛種以資其業親給印照以杜其擾凡係從前本里代賠錢糧禁其取討違者必究仍令量力認墾荒田限年起科如此則民仰 憲臺之德威羣思故土戶口無脫漏之虞荒田有漸墾之日其於

國計民生未必無小補也

一社學之宜徧設也社生一項原因其有志讀書欲圖上進故歷年歲科二考必有收錄若不與以責成則彼無所執事呼羣結黨或包攬錢糧或出入衙門起滅詞訟逞逞不少查湖南地隣苗峒人黠而悍止知逞強好事罔識禮義綱常幸賴

天朝德化所訖稍稍馴善豈能徧懾人心今宜效古鄉社里塾之法請 憲飭行各屬使各都各里擇一空曠寺廟設一講所著令本里社生主之鄉耆佐之恭列聖諭十六條明白講說逐句宣揚務使賢愚共曉男女咸



知每月朔望晨昏又令木鐸老人不時巡行高聲稱誦以醒愚頑如此則盡人咸有良心自必警醒猛惕改惡從善爲此家敦孝弟而人守倫常文教可以漸興士風可以淳正是亦轉移風教之微權也

一奴僕之宜飭辨也從來僱工佃戶原爲力役之人非同臧獲可比近見湖南人情澆薄以強欺弱往往有本屬僱工配以婢女限滿不許歸宗仍行羈留者偶或挈婦言歸輒卽指爲逃奴叛僕輾轉興訟愚民飲恨吞聲莫敢辯理殊堪矜憫又有擅將佃戶爲僕恣行役使過索租粒盤算磊利甚有呼其婦女至家

服役佃戶不敢不從者且有佃戶死亡欺其本宗無人遂賣嫁其妻若子並收其家資者諸如此類大拂人情今請 憲臺鈞示嚴飭嗣後役使奴僕必立賣契務同中保主僕當官訊明果係情願給付印照方許奴僕相看若有以利盤算準折子女爲奴及將僱工佃戶爲僕者概坐重律如此則奴僕之分明而風俗亦於此正矣

一人命之宜嚴飭也從來人命必由苦主親告爲正然必驗明真假傷真証確方可議抵其餘自縊投河食毒尤賴概不准償煌煌 憲示孰敢不遵奈湖南



之民刁狡成習動輒以人命爲奇貨情不論有無爭毆死不論服毒投繯見有族富可啖舊忿難忘遂借屍噬人或擡屍堵門或促人守屍百端凌逼橫事抄擄詞未到官而先破其家者有之矣更有匿其苦主而挺身代告者有身係遠方而恣肆鴟張者有姊歸他姓而爲妹出告者種種不法殊淆刑讞今請 憲臺嚴示飭禁嗣後人犯非係死者嫡屬餘人出告者概坐以光棍之律果係真命告官自有王法若抄擄情事仍行究擬如此則人知畏法而民寃得白刁風亦不熾矣

以上四條不過迂陋淺見未必有裨地方止因目擊身親楚俗實有流弊故敢冒昧直陳伏候採擇批示遵行奉 督部院批招撫流民此正有司之事抑占奴僕候示禁飭人命已有禁示矣社生在學校之外湖南每多冒濫借名包糧之弊本部院亦行學道查汰不便又假以事權此欸不准行繳

請禁溺女詳

同知 趙 寧

竊照湖南兵燹之後百度廢弛其風俗之衰頹士風之陵替已不可復問自憲臺下車以來佈澤施仁整綱飭紀一時民懷吏畏風俗漸淳士風丕振湖南漸



臻上理真千載一時也但此邦風俗向有溺女陋習  
至今相沿牢不可破凡生女之家或因男女過多或  
因家計貧乏卽行溺死如草菅然全不顧恤夫男女  
居室人之大倫且生育之事生男必致生女二者並  
行不能偏廢乃時俗之見以爲女生外向緩急非益  
遂分低昂伏觀往代若叔氏先雄因溺水而刺船以  
覓父禹城崔女因母病而臥冰以求魚真西山紀呂  
良子之名桂林橋著徐彩鸞之蹟誠孝格天並傳千  
古外此忠順廉節以巾幗而傲鬚眉爲門楣之慶昭  
史冊之光者何可數計然則天下之女果何所負於

長沙縣志

卷之十七

政蹟

全

親必欲致之於死或謂古今賢女不能概得雖或有  
之饑寒切膚無補今日然觀其彌月而生耳能聽目  
能視手足能運動口能呱呱而泣又何忍置之於死  
况鴟鴞之惡亦哺其子螻蟻之細亦愛其生赤子匍  
匐將入井行道之人無不心悸古人方長不折啓蟄  
不驚一物之微亦恐傷其生理何忍以天性之恩遽  
戕骨肉之愛了命登時遂使冤沉黑海不能一見天  
日似此忍心害理不特人心不古亦見風俗未淳又  
查湖南幅幘不下二千里而賦稅之出未滿江南之  
一縣具見烟民蕭瑟生齒無多又卑職奉上批詞內



係婚媾訐告者指不勝屈非曰強擄奸占卽曰一女  
兩茶甚至名姓不一展轉遷移莫可究結訪之鄰郡  
均有同情庸因女少男多絲蘿難覓遂至鼠雀之釁  
無了無休亦未可定合無仰請憲臺廣好生之仁嚴  
飭湖南七府二州各縣一體飭禁令十家鄰佑互相  
稽察如有容隱一體重懲如有真正赤貧饑寒逼迫  
不能贍養者並請憲臺格外施仁如留得一女諒爲  
周恤令各該州縣一體遵行據鄰里公呈或每助一  
金至二金爲率先爲給發年終彙造清冊申詳憲臺  
據詳准給則貧乏之家不但以生女爲累而反以

生女爲幸矣倘後有賢有司仰體憲臺德意各相鼓  
舞自爲周恤則憲臺一舉念間自可全活生靈無算  
人心返古惡習頓除憲臺好生之仁昭垂於無盡矣  
修考棚案

爲懇電苦情等事據士民周使喬等呈前事該知縣  
朱前詒看得歲科關係大典而公署場屋修整宜急  
查各省學憲案臨必有額設衙署修理必有備用錢  
糧長沙自遭吳逆變亂之後焚燬無餘各欸裁充兵  
餉凡遇上憲經臨駐札一切承應事事取給於兩邑  
力役之征勢所不免今歲科兩試蒙憲臺垂憐疲邑



諭將府學修作公署兩廡借爲號房以免另造棚廠  
此實憲臺愛惜民財之盛心兩邑士民無不額手頌  
德惟是土木之工難於臆料增修添造所費甚多目  
下雖竭蹶趨工而費金無底痛極悲號未免尋源溯  
本茲據士民<sup>某</sup>等呈開用過三百餘兩尙未告竣一  
月有餘未曾歇工且十二州縣應考何以獨累兩邑  
十二州縣童生上進彼地增光與長善何涉乃以賣  
絲糶穀之脂膏供各縣遊泮採芹之盛舉卽懇詳明  
照屬公捐等語情詞激切實堪憐憫蒙所批原協銀  
二十兩比因草昧初開諸事簡畧今則教養漸興文

長沙縣志

卷之十七

政蹟

全

明正熾非規模宏遠不足以壯觀瞻而肅

國體也况歲科盛事原爲士子觀光而設各屬士民誰  
無子弟自應鼓舞樂輸非同瑣屑之事懇乞恩准均  
派各邑協辦永爲定例使歲科公務不偏累兩邑則  
培造之德與河山共綿邈矣奉本府任 批據詳修  
葺府學以作學憲考場約費三百金是否果有此數  
仰縣會同監修沈照磨將用過銀兩確加查核逐項  
造冊費府以憑核明分認繳

修復古道案

此前明知縣林向陽唐源復古道蘇夫馬申詳案



畧也府舊志縣舊志均載之今仍錄存之

爲開復古道以免私幫事萬歷三十五年里遞周望  
呂告稱附郭長善如居弓背湘潭寧鄉若弦兩頭湘  
寧相去百二十里開闢以來通有官道共計十一舖  
曰桐木茶園東湖赤子聚山宗師道林黃蠟烏田楊  
梅大栗中途設道林大公館從來過客自兩廣衡寶  
而北由湘潭徑至寧鄉自遠直雲貴川陝而南由寧  
鄉徑至湘潭必不遠道長善自萬歷十七年本省按  
院柯經過至道林二縣違悞中火柯院嗔問左右答  
云此小路遙遠柯院隨示以後不必行此奸民柳興

長沙縣志

卷之十七

政蹟

畝

春乘此計滕二縣將公館折毀私立片石詐稱奉旨  
蔽塞致官差曲遶長善增添二百里夫馬晝夜無停  
馬戶逃竄里地私幫每匹六七十兩到今民窮財盡  
考志畫圖哀復古道以蘇民困等情蒙按院皮 批  
守巡道袁王李行府蒙本府汪 轉行四縣從長議  
處又關委同知越 喚集正官長沙趙 善化陳  
湘潭姚 寧鄉徐及里遞人等逐一踏勘要見前路  
奉前院議塞至今告開果否堪行並查道林各處館  
舖基趾有無見存蒙同知越公同親勘回關叅云自  
寧鄉起至木林止約八十里寧鄉界自木林起至湘



潭約四十里湘潭界寧鄉界內二十里有茶園舖在  
居民譚加寶屋左手又十里東湖公館傍一舖基居  
民彭學六稱自嘉靖四十一年建又二十里有聚山  
公館在民羅伯先任坐又二十里有道林公館蔣德  
仁供稱公館兩傍係生員張所有姜明誠所侵中空  
原地見存又十里係木林志載黃蠟舖係劉采見在  
湘潭界內十里有烏田公館見有週圍土墻三十里  
抵縣楊梅栗山舖基各存山路平坦轎馬通行四縣  
各執一詞總之路原古道啓閉在人等語具由關復  
隨湘潭周流奇等將俯援明旨塞徑解懸等情呈告

長沙縣志

卷之十七

政蹟

全

守道王 批府卽將湘潭縣原塞古道聖旨文卷限  
三日內馬上齎查如無旨卷卽將周流奇一千解府  
究詳據湘潭回云並無旨卷止奉柯院明文刻一石  
碑云道林小路夫馬悉行禁止隨周望呂將詐冒聖  
旨私塞古道欺君罔憲等情具告撫院張 巡道何  
轉批本府莊 蒙府再行酌議條陳開復欸目轉  
申延擱至三十九年周望呂再告按院皮 及藩臬  
二司俱批府府又關委通判蕭 合同四縣再勘要  
見基趾有無屢告應否開復館舖作何議建錢糧作  
何設處蒙通判蕭 會同長沙林 善化唐 湘潭



包 寧鄉袁 勘得道林古路寬直如前人烟亦密  
貿易亦多員役雖未經由客商往來如故館舖雖設  
基址各存自今復之未爲不可但湘潭申稱夫馬疲  
困寧鄉申求協濟具由申府延至四十一年里老續  
告按院錢 并條陳六款行府轉批四縣又該長善  
將湘潭包 叅文駁申云據包云道林小路山行崎  
嶇田行跚蹕乃同知越 回文曰寬平坦道轎馬通  
行通判蕭 回文曰平寬古道今宜開復果小路乎  
包云兩粵衡寶之往江浙直閩江浙直閩之往兩粵  
衡寶此湘潭所有長善所無又如京省往江浙閩與  
江浙閩直至醴陵長善過寧鄉由雲貴京師至寧鄉  
過長善由南省至湘陰長善往寧鄉此三路湘潭有  
乎由兩粵至湘潭長沙往湘陰由京省至湘陰長善  
往醴陵并湘潭由浙直江閩至醴陵長善往湘陰此  
三路又寧鄉有乎是六者之苦長善所兼有湘寧所  
獨無以苦多之縣而又益以湘寧枉道之苦譬一人  
既負重擔而又加以數千斤之物有不斃而仆者乎  
包云長善本有之苦忽無湘潭本無之苦忽有縣設  
夫馬止有此數未滿三日遂踰百名百匹夫古道未



塞湘潭必送寧鄉是原有之苦而非本無也古路旣塞湘潭亦必送至長善夫馬未見損減而其苦自在也獨長善自十七年後頓增此枉道本無之苦而非本有也况當七路之衝每遇上司冗至或一時百匹一日百匹豈止三日踰百匹哉云潭至長善九十里至寧鄉一百一十里然潭至寧鄉僅一百二十里每日僅添二十里如長善至潭寧二百里每日添百里恤已之二十里而加人以百里其誰堪之總之堂上之人方能辨堂下之曲直若必使四縣自爲議不啻三年不成已也此事大都吃緊有三復館舖之工料

長善相應任之而監工官則須府委專員其舖兵工食應查原設舖兵提在何縣原額工食或寄役外縣應當掣回或原係二縣原有錢糧應復其舊至多遠二十里查不衝縣分多寡協濟夫馬若夫詐冒聖旨此不過愚民一時虛張之計豈必根究到底二縣參酌已定具申兩院隨據長善鄉官舉貢生員各呈按院蒙院亦助百金修舖又面諭四縣毋分彼此將所分道途長短與夫馬多寡合一均攤驗程分派又該長善稽查府志四縣相去道路逐一均攤具申湘潭復阻不開長善復告蒙撫院董批據申道林古道



本院於戊申之冬會由寧鄉經抵湘潭委爲直捷按院經過目睹捐金修改何湘潭夫馬之故阻也其中必有不均仰該道查議明妥速詳又奉按院錢批修復古路以均其累亦覺可行第久塞倏開未免爭執事關四縣不得僉同該道真見可以定狐疑速從長吏決之無使同舟若敵國行繳巡道崔批府下縣該長善知縣林唐會議得同舟難爲敵國苦樂要在得均古道通復四縣不啻聚訟數年於茲矣要之世無積久不決之疑政有一定可行之理此事可數言決耳蓋湘寧至長善雖倖免二十里之勞於支應

等項未見損由長善送至湘寧旣多添二百之苦於支應等項又爲重添而湘潭之撓阻何也以湘潭遠來長善可以舟楫順流而下差使希圖折乾夫馬省勞行役獲利徑至寧鄉則由旱路遂造浮言激動官紳力爲撓阻不知所利者止在夫馬數輩人於湘潭之官費原未得省於百姓原未加福於鄉紳體面原無損長善除原極衝五道外新增本無二路不特累敗夫馬兵禁下程儀節且費民間千金然湘潭夫馬卽由旱至寧鄉亦其本等何得偷安圖利而就水况水有風波之險如上年沈行人損箱盡覆此明驗也



況今長善議助工費於湘寧矣而竟執於湘潭之浮議不知天下事當論利害不當分彼此當存公道不當任意氣在長善之欲開原非以本有而貽累別縣在湘寧不欲開者不過惑奸計而愛惜情面然而前日之塞百姓未必見德今日之開百姓未必歸怨又何必堅直不從也長善苦若倒懸詞告五院二司七道三府及委官十員會勘二縣業經議詳七次其利病苦樂纖悉條陳在卷一睹了然乃長善小民士夫之呼籲愈切而愈不獲伸潭寧抗不議覆奉士紳之片言如金石而小民倚恃牢不可破嗟嗟權勢之傾

長沙縣志

卷之十七

政蹟

完

人可畏也但就四縣論各爲其民在上司論均爲赤子何利何害何去何從一斧斷而定矣以此不避招怨不顧情面備將轉達情詞具申奉巡道崔 批復古道一事關切四縣民情節行確議具申詳妥卽准詳兩院蒙撫院董 批道林古道旣經區處修建協助苦樂必均俱如議會同四縣開復按院錢 批修復古道長善議妥該道仍行府諭令湘寧二縣會同遵行延至四十三年府縣俱入覲矣延至四十四年周望呂等刻書具告巡道劉 終爲湘潭士夫所泥此事竟成築舍姑錄始末大概於此以俟稽考云



禁挖黃泥案

乾隆四十四年奉本府王 札轉奉撫部院李 札  
開照得省會居民因燒煤炭需用黃土肩負小民遂  
向城外挖取挑賣以爲覓食之計原難一概禁止但  
查瀏陽門小吳門南北二門等城外官地多有荒塚  
近聞殘忍之徒每在墳邊刨挖黃土以致骸骨暴露  
纍纍伊等只圖自覓蠅頭罔顧禍及枯骨利己損人  
喪良實甚查近山空隙之處出產黃土甚多皆由挑  
土人等吝惜脚力不肯遠行所致似此殘忍之事不  
可不嚴行查禁合行札飭札到卽飭長善二縣親赴

長沙縣志

卷之十七

政蹟

七

瀏陽等門外逐段查勘凡有墳塚骸骨暴露之處立  
卽督率人夫加土掩蓋并插立木牌禁止刨挖責成  
該管保甲看守一面出示曉諭嗣後賣土小民務於  
近山空曠地方許其挖取挑賣示後再有在城外附  
近荒塚處所挖挑黃土致將枯骨暴露許該管保甲  
扭稟赴縣訊實重法究治並令守領佐雜各員不時  
親往查察毋得泛視干咎仍將作何查辦緣由具覆  
以憑遴員前往按段覆查察奪等因奉此查省會瀏  
陽小吳南北等門城外皆係城中來龍過脈之處有  
關風水且俱墓有墳塚不便任其摧殘久經飭縣嚴



禁掘挖黃土碎石并禁取石燒灰有傷荒塚等因行  
縣遵辦在案嘉慶十三年六月奉臬憲會燠札開本  
司訪聞瀏陽門小吳門南北二門外一帶山坡近來  
常有民人刨挖黃土該處塚墓甚多一經刨挖遂至  
墳土傾卸棺木暴露且聞日前有孩童挖塚內之土  
以致墳傾壓死之事亟應禁止札仰該縣即便遵照  
移會該縣縣丞並善化縣縣丞及府經歷按十日一  
次輪流親往巡查如再有刨挖黃土者立即拏究倘  
經歷縣丞敢於怠忽並不認真查拏定卽揭叅不貸  
毋稍違延此札等因知縣趙文在遵照移查並經飭  
差巡查如有棺木暴露及墳塚塌陷之處卽令地保  
撥夫挑土塙掩並示禁於瀏陽小吳南北等門外不  
得挖取黃土其有應需黃土者務於大西草場二門  
外對河無墳空曠隙地取運挑賣遂無取土侵墳之  
事後之司土者其隨時留意焉



懇請再題分闈呈

附

陳鵬年

呈爲洞庭之風濤甚險部議之駁稿不公懇恩再題以廣

阜仁以伸士氣事洞庭之水自夏初至秋盡巨浸汪洋綿亘數百里狂風惡浪發作不常每當大比之年貧寒士子或十數人或數人歛費僦舟衝濤而往一舟覆溺則所損者多人一番淪波則各郡縣引以爲戒於是湖南士子畏怯不前有終身未見場屋者動曰湖南人少是因洞庭之險而少非諸生額數少於湖北郡縣少於湖北學冊輿圖歷歷可稽也同有三載觀長沙縣志

卷之十七

政蹟

叁

光之願而以險遠不前同受

聖朝教養之恩而以向隅爲泣此湖南士子所由屢次呼號冀邀

天聽也前此撫憲趙

潘

兩疏均格於部議不行緣幸

欽憲見憐復錄苦情人告惟

皇上如天好生之仁下及昆蟲遠字海外

聖慮所周無不淪浹於楚南洞庭之險甫經摺奏卽惻然垂憫

諭以具本硃批湖南士子踴躍呼天延頸待澤及部議之日滿大人仰體



聖恩秉議虛公無所偏倚謂湖南士子較湖北額數稍多  
止因隔於洞庭與鄉試者最少近因澧州數學爲洞  
庭所隔艱於應試前學溥有德以分棚具題蒙

皇上矜憐允行在案今楚南士子旣情愿捐貲分立貢院  
不煩

國帑不務紛更所全性命者多所關文教者廣此舉義  
應請行而漢堂回互多方故持兩議一則曰洞庭雖  
險有東西驛路可通不思西北地勢平坦店舍車馬  
絡繹往來若湖南之永郴辰靖常寶長岳等處距武  
昌或千餘里多崇山峻嶺除驛卒茅舍數椽足供奔

長沙縣志

卷之十七

政蹟

三

走文書而外無騾馬可雇店房可居貧寒士子豈能  
裹糧擔簦崎嶇數千里以求入試幸而冒險入闈者  
有二千餘人若責令由東西驛路則湖南士子永無  
入場之望矣再則曰不由洞庭則有小河可往夫洞  
庭分截南北瀾漫入百餘里自衡永至湘陰不能飛  
渡青草湖自辰靖至常德者不能飛渡天心湖若驅  
通省赴試之人皆由常德過荊州而下水道旣已紆  
迴又不能越馬家湖而飛渡總之自楚南往北者無  
不過洞庭之水路亦無洞庭以外之小河若令士子  
輾轉風波重以舟楫之憂阻其上進之路豈我



皇上如天好生之仁一視同仁之意乎漢議既有所偏九  
卿爲主議者又或不諳形勢竟以無庸議具覆其間  
公私同異之故不辨而可知矣伏懇再爲題請  
勅差公正大人會同查勘水陸二道情形庶公議可伸下  
情可達分闈取士人材蔚興士子生生世世感戴  
天恩於無旣矣

請分選湖南湖北公呈

主事 王文清

爲兩闈鄉試旣分教職自宜各選額恩題復在例以  
疏邊方壅滯事竊惟教職例選本鄉秉鐸觀光兩便  
揀選原分遠近南北告降殊科緣湖南遠連黔粵險

長沙縣志

卷之十七

政蹟

六

隔洞庭故舉人本科揀選知縣降作教諭者亦例從  
本科起選原與近在湖北三科揀選者不同因往年  
未賜分闈湖南應舉者少中式寥寥故湖南教諭一  
途遂爲湖北舉人之捷徑而湖南恩拔副榜及改降  
舉人本分應選之缺盡爲湖北舉人占去曾蒙前院  
趙憲題請分選已經奉

旨允行如譚又新蔡來儀譚仙芝俱係湖南舉人降選湖  
南教諭可據奈分選未幾復將教諭例破仍從通選  
不與訓導同塗致窮老青衫一氈難得目今湖南州  
縣教諭缺六十有三湖南本籍止選三員餘六十人



總皆湖北破例者計京華路隔五千惟有守株候選  
缺出則捷足先得何年遍及窮鄉况邀浩蕩

皇恩鄉闈已分兩省則每科送考觀場例應各從附近而  
貧員領憑赴任豈堪阻滯重湖勞逸不均彼此兩困  
今又荷 殊恩驗看凡衰老者許就教職倘不請復  
往年分選之例則湖北舉人攬占湖南之缺湖南缺  
少人多竟使邊地寒儒沒齒難膺一席切湖南與湖  
北今已截然兩省既分撫軍分藩臬又分鄉闈自應  
各就其鄉邦各訓其子弟豈應垂暮冷官風波遠涉  
卽如浙閩兩廣川陝等處俱共總制統轄不聞諸省  
長沙縣志

卷之十七

政蹟

九

教職彼此混選互相攙越也伏乞俯憐寒微恩賜題  
請將舉人恩拔副歲一體照例分選庶湖南有員有  
缺得免向隅湖北有缺有員亦無遺滯矣